



Godina XII - Broj 17

ZENICA, Ponedjeljak, 05. 11. 2007.

SKUPŠTINA**253.**

Na osnovu člana 37. stav 1. tačka g) Ustava Zeničko-dobojskog kantona, Skupština Zeničko-dobojskog kantona, na 10. sjednici, održanoj dana 27.09.2007. godine, d o n o s i

Z A K O N
o izmjeni Zakona o porezu na promet
nekretnina

Član 1.

U Zakonu o porezu na promet nekretnina ("Službene novine Zeničko-dobojskog kantona", broj: 24/99, 11 /01, 8/02 i 7/04), u članu 17. stav 2., broj "0,06%", zamjenjuje se brojem 0,04%".

Član 2.

Zadužuje se Zakonodavno-pravna komisija Skupštine Zeničko-dobojskog kantona da utvrdi prečišćeni tekst Zakona.

Član 3.

Zakon stupa na snagu osmog dana od dana objavljivanja u "Službenim novinama Zeničko-dobojskog kantona".

Broj: 01-02-22241/07

Datum, 28.09.2007. godine

Zenica

PREDSJEDAVAJUĆI

Sejad Zaimović, s.r.

254.

Na osnovu člana 37. stav 1. tačka f) Ustava Zeničko-dobojskog kantona, Skupština Zeničko-dobojskog kantona na 10. sjednici održanoj dana 27.09.2007. godine, donosi

ZAKON O VODAMA
ZENIČKO-DOBOJSKOG KANTONA

I. OSNOVNE ODREDBE**Član 1.****(Predmet Zakona)**

(1) Ovim se zakonom uređuje način upravljanja vodama na teritoriji Zeničko-dobojskog kantona (u daljem tekstu: Kanton).

(2) Upravljanje vodama obuhvata zaštitu voda, korištenje voda, zaštitu od štetnog djelovanja voda i uređenje vodotoka i drugih voda.

(3) Ovim se zakonom uređuje vodno dobro i javno vodno dobro, vodni objekti, pravne osobe i druge institucije nadležne za pojedina pitanja upravljanja vodama i druga problematika vezana za vode Kantona, kao i pitanja ovlaštenja, koja treba urediti u skladu sa Zakonom o vodama ("Službene novine Federacije Bosne i Hercegovine", broj: 70/06) (u daljem tekstu: Federalni zakon).

Član 2.**(Svrha Zakona)**

Svrha ovog zakona je osiguranje upravljanja vodama s ciljem:

1. smanjenja zagađenja voda, postizanja dobrog stanja voda i sprječavanja degradacije voda,
2. postizanje održivog korištenja voda,
3. osiguranje pravičnog pristupa vodama,
4. poticanje društvenog i privrednog razvoja,
5. zaštita ekosistema,
6. smanjenje rizika od poplava i drugih negativnih uticaja voda,
7. osiguranje učešća javnosti u donošenju odluka koje se odnose na vode i
8. sprječavanje i rješavanje sukoba u pogledu zaštite i korištenja voda.

II. OSNOVNA NAČELA I DEFINICIJE**Član 3.****(Opća načela i definicije)**

(1) Vode su opće dobro i kao takve su pod posebnom zaštitom Kantona i općine.

(2) Osnovna načela i definicije upotrijebljene u ovom Zakonu imaju isto značenje, kao što imaju osnovna načela i definicije upotrijebljene u članovima 3. i 4. Federalnog zakona.

III. RAZVRSTAVANJE POVRŠINSKIH VODA, VODNO DOBRO I VODNI OBJEKTI

Član 4.

(Razvrstavanje i podjela površinskih voda i vodno dobro)

(1) Površinske vode na području Kantona prema značaju koji imaju za upravljanje vodama, razvrstavaju se u površinske vode I kategorije i površinske vode II kategorije.

(2) Vode I kategorije su vodotoci Bosna, Krivaja i Usora, a sve ostale vode su vode II kategorije.

(3) Bliže odredbe o podjeli površinskih voda i vodnom dobru detaljnije su obrađene u članovima 6. i 7. Federalnog zakona.

(4) Ministarstvo za poljoprivredu, šumarstvo i vodoprivredu Zeničko-dobojskog kantona (u daljem tekstu: Ministarstvo) utvrđuje granicu pojedinačnog vodnog dobra za površinske vode II kategorije, na osnovu propisa iz člana 8. stav 1. Federalnog zakona.

(5) Granica vodnog dobra upisuje se u katastar zemljišta.

Član 5.

(Javno vodno dobro)

(1) Pojam "javno vodno dobro" regulisan je članom 9. stav 1. i 2. Federalnog zakona.

(2) Javno vodno dobro za sve površinske vode II kategorije u vlasništvu je općine.

(3) Upravljanje javnim vodnim dobrom vrše organi vlasti, pravne osobe i druge institucije, u obimu i na način propisan ovim Zakonom ili drugim aktima nadležnog organa kojima je preneseno pravo upravljanja javnim vodnim dobrom.

(4) Pojam "vodno dobro" regulisan je članom 7. Federalnog zakona.

Član 6.

(1) Rješenjem ministra Ministarstva za poljoprivredu, šumarstvo i vodoprivredu Zeničko-dobojskog kantona (u daljem tekstu: Ministra) utvrđuje se pripadnost vodnog dobra javnom vodnom dobru za površinske vode II kategorije, prema propisu iz člana 8. stav 1. Federalnog zakona.

(2) Javno vodno dobro ne može biti predmet prometa, ali može, pod posebnim uslovima određenim ovim zakonom ili na zakonu zasnovanom podzakonskom propisu, biti predmet ograničenog prava korištenja u obliku zakupa.

(3) Obaveza donošenja podzakonskog akta iz stava (2) ovog člana je utvrđena i u članu 10. stav 2. Federalnog zakona.

(4) Zemljišna čestica prestaje biti dijelom javnog vodnog dobra pod sljedećim uslovima:

a) ako se rješenjem Ministra iz stava (1) ovog člana utvrdi da čestica prestaje ispunjavati uslove vodnog dobra;

b) donošenjem odluke Vlade Kantona kojom je, na drugi način, za posebne opće potrebe i namjene, određena upotreba tog javnog vodnog dobra.

(5) Status javnoga vodnog dobra prestaje datumom upisa promjene statusa u zemljišne knjige, na osnovu donesenog rješenja ili odluke iz stava (4) ovog člana.

Član 7.

(Zahvati na vodnom dobru)

(1) Na vodnom dobru nije dozvoljeno izvoditi zahvate, osim:

1. gradnje objekata javne infrastrukture (putevi, željeznice, mostovi, plinovodi i sl.);
2. gradnje zaštitnih vodnih objekata;
3. zahvata koji se odnose na poboljšanje hidromorfoloških i bioloških karakteristika površinskih voda;
4. zahvata koji se odnose na zaštitu prirode;
5. gradnje objekata potrebnih za korištenje voda (objekata za zahvat i akumuliranje vode) i objekata za zaštitu od utapanja na prirodnim kupalištima;
6. gradnje objekata namijenjenih zaštiti voda od zagađenja;
7. gradnje objekata namijenjenih potrebama rada državnih organa, zaštiti i spašavanju ljudi, životinja ili imovine od prirodnih i drugih nesreća, te provođenju zadataka policije.

(2) Zahvati iz stava (1) ovog člana podliježu uslovima propisanim ovim Zakonom i propisima o građenju.

Član 8.

(Vodni objekti)

Vodni objekti su objekti ili skupovi objekata koji, zajedno s pripadajućim uređajima, čine tehničku, odnosno tehnološku cjelinu i služe za: zaštitu od štetnog djelovanja voda, zahvatanje voda radi njihovog namjenskog korištenja i zaštitu voda od zagađivanja.

Član 9.

(Vrste objekata s obzirom na namjenu)

- (1) Vodni objekti s obzirom na njihovu namjenu su:
1. zaštitni objekti – nasipi, obaloutvrde, uređena korita vodotoka, odvodni kanali, obodni (lateralni) kanali za zaštitu od vanjskih voda, odvodni tuneli, brane s akumulacijama, ustave, retnizije i drugi pripadajući objekti, kao i objekti za zaštitu od erozija i bujica;
 2. objekti za odvodnjavanje – osnovna i detaljna odvodna kanalska mreža, crpne stanice za odvodnjavanje i drugi pripadajući objekti;
 3. objekti za iskorištavanje voda za:

- vodosnabdijevanje (izuzev za opću upotrebu voda) – brane i akumulacije, vodozahvati, bunari, kapitaže s odgovarajućom opremom, postrojenja za prečišćavanje vode za piće, rezervoari i cjevovodi i drugi pripadajući objekti, javne česme i javni bunari,
- snabdijevanje vodom privrednih subjekata - brane i akumulacije, vodozahvati, bunari, kapitaže s odgovarajućom opremom i cjevovodi i drugi pripadajući objekti,
- navodnjavanje – brane i akumulacije, dovodni kanali i tuneli, vodozahvatne građevine, crpne stanice, ustave, dovodna i razvodna mreža i drugi pripadajući objekti,
- korištenje vodnih snaga – brane i akumulacije, vodozahvati, dovodni i odvodni objekti i drugi pripadajući objekti i oprema,
- ostale namjene - objekti za uzgoj riba, rekreacioni bazeni, jezera i dr.;

4. objekti za zaštitu voda od zagađivanja (u daljnjem tekstu: vodni objekti za zaštitu voda) – kolektori za prijem i transport otpadnih voda, postrojenja za prečišćavanje otpadnih voda, ispusti u prijemnik i drugi pripadajući objekti i oprema.

(2) Vodni objekti iz stava (1) ovog člana mogu imati istovremeno i više namjena – višenamjenski vodni objekti.

Član 10.

(Vlasništvo nad objektima)

(1) Zaštitni vodni objekti iz člana 9. stav (1) tačka 1. ovog zakona na vodotocima koji pripadaju površinskim vodama II kategorije i uređena korita u urbanim područjima na površinskim vodama I kategorije u vlasništvu su općine.

(2) Općina može pravo upravljanja i korištenja prenijeti u nadležnost drugih organa vlasti, pravnih lica ili drugih institucija u obimu i na način propisan ovim Zakonom ili aktima općine.

(3) Općina je dužna da obezbijedi materijalne i organizacione uslove za održavanje objekata iz stava (1) ovog člana u funkcionalnom stanju i da se oni koriste u skladu sa njihovom prirodom i namjenom, kao i čuvanje od uništenja, oštećenja odnosno nenamjenskog korištenja.

(4) Općinsko vijeće donosi odluku o načinu korištenja i drugim pitanjima od značaja za održavanje i čuvanje objekata iz stava (1) ovog člana.

Član 11.

(1) Vodni objekti iz člana 9. stav (1) tačka 2. i 3. alineja 2., 3. i 5. ovog zakona koji su izgrađeni državnim sredstvima u vlasništvu su Kantona.

(2) Kanton pravo upravljanja i korištenja vodnih objekata iz stava (1) ovog člana može prenijeti na pravna lica ustanovljena prema propisima o komunalnoj djelatnosti.

(3) Vodni objekti iz člana 9. stav (1) tačka 2. i 3. alineja 2., 3. i 5. ovog zakona koje su za svoje potrebe izgradila pravna ili fizička lica u njihovom su vlasništvu i oni brinu o upravljanju tim objektima.

Član 12.

(1) Vodni objekti iz člana 9. stav (1) tačka 3. alineja 1. ovog zakona koji se nalaze na području dvije ili više općina Kantona, odnosno dvije ili više općina na području Kantona i drugog kantona u vlasništvu su Kantona, odnosno Kantona i drugog kantona, a vodni objekti koji se nalaze na području jedne općine u njenom sjedištu vlasništvo su te općine.

(2) Vodni objekti iz člana 9. stav (1) tačka 4. ovog Zakona u općinskim centrima u vlasništvu su općine.

(3) Vlasnici vodnih objekata iz stava (1) i (2) ovog člana pravo upravljanja i korištenja mogu prenijeti na pravna lica ustanovljena prema propisima o komunalnoj djelatnosti i to samo na pravna lica u vlasništvu države.

(4) Vodni objekti iz člana 9. stav (1) tačka 3. alineja 1. i tačka 4. ovog zakona što su ih za svoje potrebe izgradila pravna ili fizička lica u njihovom su vlasništvu i ona brinu o upravljanju tim objektima.

(5) Vodni objekti iz člana 9. stav (1) tačka 3. alineja 1. ovog zakona koji služe za snabdijevanje vodom za piće naselja izvan općinskih sjedišta su mjesni vodovodi, javne česme i javni bunari.

(6) Vlasnici mjesnih vodovoda dužni su da obezbjeđuju tekuće investiciono održavanje objekata mjesnog vodovoda, sredstava za amortizaciju i troškove propisanih pregleda o zdravstvenoj ispravnosti vode za piće.

(7) Cijena vode isporučene iz mjesnog vodovoda ne može biti određena ispod iznosa koji osigurava pokrivanje troškova iz stava (6) ovog člana.

(8) Vodni objekti iz člana 9. stav (1) tačka 4. ovog Zakona na području izvan općinskih sjedišta su u vlasništvu građana koji su ih izgradili za svoje potrebe i dužni su da obezbijede finansijske i organizacione uslove za održavanje i funkcioniranje tih objekata.

Član 13.

Vodni objekti iz člana 9. stav (1) tačka 3. alineja 4. ovog zakona u vlasništvu su pravnih ili fizičkih lica koja su izgradila te objekte i ona brinu o upravljanju tim objektima, a u skladu sa ovim zakonom i Zakonom o komunalnoj djelatnosti ("Službeni list SR BiH", broj: 20/90).

Član 14.

(1) Vlasnici, odnosno korisnici vodnih objekata iz članova 9., 10., 11., 12. i 13. ovog zakona dužni su objekte održavati u funkcionalnom stanju i koristiti ih u skladu sa njihovom prirodom i namjenom.

(2) Vlasnik, odnosno korisnik vodnog objekta iz stava (1) ovog člana dužan je, u slučaju prestanka upotrebe tog objekta, postupiti u skladu sa vodnim aktom, odnosno objekat održavati u stanju koje neće prouzrokovati štete režimu voda i trećim licima.

(3) Ako vlasnik, odnosno korisnik ne održava vodni objekat u funkcionalnom stanju i ne koristi ga na način određen u stavu (1) ovog člana, Kantonalna, odnosno općinska vodna inspekcija iz člana 129. ovog zakona rješenjem nalaže potrebne mjere.

(4) Vlasnik, odnosno korisnik vodnog objekta dužan je vodni objekat održavati i koristiti u skladu sa općim aktom o održavanju, korištenju i osmatranju vodnog objekta i postupanju u slučaju kvara ili havarije na objektu.

(5) Vlasnik, odnosno korisnik vodnog objekta dužan je brinuti o čuvanju vodnih objekata i uređaja na njima od slučajnog ili namjernog oštećenja ili uništenja i dužni su naknaditi štetu koju pričinje trećim licima.

(6) Obaveza donošenja podzakonskog akta iz stava (4) ovog člana je utvrđena u članu 20. stav 6. Federalnog zakona.

IV. UPRAVLJANJE VODAMA**Član 15.****(Upravljanje vodama)**

Upravljanje vodama na području Kantona je u nadležnosti Kantona i općina, na način utvrđen ovim i Federalnim zakonom.

Član 16.**(Ciljevi upravljanja vodama)**

Ciljevi upravljanja vodama su: postizanje dobrog stanja, odnosno dobrog ekološkog potencijala površinskih i podzemnih voda, odnosno vodnih i uz vodu vezanih ekosistema, umanjeње šteta prouzrokovanih raznim štetnim djelovanjem voda, osiguranje potrebnih količina vode odgovarajuće kvalitete za razne namjene i podsticanje održivog korištenja voda, uzimajući u obzir dugoročnu zaštitu raspoloživih izvorišta i njihovog kvaliteta.

1. Teritorijalne osnove upravljanja vodama**Član 17.****(Vodna područja)**

(1) Osnovna teritorijalna jedinica za upravljanje vodama je vodno područje.

(2) Područje Kantona u cjelini pripada Vodnom području Save iz člana 23. stav 3. Federalnog zakona.

(3) Vodno područje Save obuhvata dio međunarodnog riječnog bazena Dunava (dio međunarodnog podbazena Save) na teritoriji Bosne i Hercegovine, odnosno Federacije BiH.

(4) Granice riječnih bazena i vodnih područja na teritoriju Federacije utvrđuje Vlada Federacije, na prijedlog nadležnog Federalnog ministarstva, a u skladu sa članom 23. stav 5. Federalnog zakona.

2. Strategija i planovi upravljanja vodama**Član 18.****(Strategija i planovi upravljanja vodama)**

Strategija i planovi upravljanja vodama uređeni su odredbama članova 24. do 43. Federalnog zakona.

V. KORIŠTENJE VODA**Član 19.****(Korištenje voda)**

Korištenje voda, prema ovom zakonu, obuhvata:

1. zahvatanje, crpljenje i upotrebu površinskih i podzemnih voda za različite namjene (snabdijevanje vodom za piće, sanitarne i tehnološke potrebe, navodnjavanje i dr.),
2. korištenje vodnih snaga za proizvodnju električne energije i druge pogonske namjene,
3. korištenje voda za uzgoj ribe,
4. korištenje voda za sport, kupanje, rekreaciju, liječenje i druge slične namjene.

Član 20.

(1) Svakome je dozvoljeno korištenje vode pod uslovima određenim ovim zakonom.

(2) Voda se mora koristiti racionalno i ekonomično. Svaki je korisnik vode dužan koristiti se vodom na način i u obimu kojim se voda čuva od rasipanja i štetnih promjena njezinih osobina (kvalitete) i omogućuje zakonsko pravo korištenja voda drugim licima.

Član 21.**(Opća upotreba vode)**

(1) Svakome je dozvoljeno koristiti vodu običnim načinom koji ne zahtijeva posebne naprave i ne isključuje druge od jednakog korištenja vode (opća upotreba vode).

(2) Opća upotreba vode obuhvata naročito:

1. zahvatanje vode bez posebnih naprava iz vodonosnika i jezera za osnovne potrebe jednog domaćinstva,
2. zahvatanje podzemne vode (bunar na vlastitom zemljištu) ili vode s izvora na vlastitom zemljištu, koja se koristi za osnovne potrebe jednog domaćinstva,

3. prikupljanje i korištenje oborinskih voda za osnovne potrebe jednog domaćinstva, koje se skupljaju na vlastitom zemljištu,

4. rekreaciju na vodama.

(3) Osnovnim potrebama domaćinstva iz stava (2) ovog člana smatra se korištenje vode za piće, održavanje čistoće i slične potrebe u domaćinstvu. Takvim korištenjem ne smatra se korištenje vode za navodnjavanje, te korištenje vode u tehnološkom procesu pri obavljanju privredne djelatnosti.

Član 22.

(1) Za svako korištenje vode koje prelazi obim opće upotrebe iz člana 21. ovog zakona potrebna je vodna dozvola, u skladu sa ovim Zakonom.

(2) Korištenje vode za snabdijevanje stanovništva vodom za piće, sanitarne potrebe i potrebe protivpožarne zaštite ima prednost u odnosu na korištenje vode za ostale namjene iz člana 19. ovog zakona.

(3) Planom upravljanja vodama može se, zbog određenih specifičnih uslova i potreba, odrediti pravo prvenstva korištenja vode za ostale namjene, uz obavezno davanje prvenstva namjenama iz stava (2) ovog člana.

Član 23.

(Kvalitet vode za piće)

(1) Kvalitet vode koja se koristi za piće (vodosnabdijevanje) mora odgovarati uslovima utvrđenim propisom o kvaliteti vode za piće u skladu sa članom 48. Federalnog zakona.

(2) Pravno lice koje obavlja djelatnost vodosnabdijevanja dužno je osigurati stalni i sistematski pregled vode i preduzimati mjere za osiguranje zdravstvene ispravnosti vode za piće i tehničke ispravnosti uređaja, u skladu sa propisom iz stava (1) ovog člana.

(3) Kontrolu vode za potrebe snabdijevanja vodom za piće može vršiti samo ovlaštena laboratorija, a uslove koje mora ispunjavati ovlaštena laboratorija, sadržaj i način dobijanja ovlaštenja, utvrđuje se podzakonskim aktom iz člana 48. stav 4. Federalnog zakona.

Član 24.

(Korištenje vode iz izvora i podzemnih voda)

(1) Korištenje vode iz izvora i podzemnih voda, osim opće upotrebe vode, može se odobriti samo ako su prethodno obavljani vodoistražni radovi.

(2) Vodoistražnim radovima smatraju se radovi i ispitivanja radi utvrđivanja postojanja, rasprostranjenosti, količine i kvalitete podzemne vode na određenom području.

Član 25.

(Obaveza vođenja evidencije)

(1) Pravna i fizička lica koja zahvataju i crpe vodu, osim opće upotrebe vode, dužna su voditi evidenciju o

količinama zahvaćene vode i o tome dostavljati podatke nadležnoj agenciji za vodno područje.

(2) Propis o sadržaju i načinu vođenja evidencije i dostavljanja podataka iz stava (1) ovog člana donijeće se u skladu sa članom 50. stav 2. Federalnog zakona.

Član 26.

(Obaveza prijavljivanja)

(1) Pravno i/ili fizičko lice koje prilikom rudarskih radova, iskopa tunela, drugih iskopa i bušenja tla naiđe na podzemnu vodu dužno je, najkasnije u roku od 48 sati od nalaska vode, to prijaviti vodnom inspektor, odnosno Agenciji za vodno područje ili najbližoj policijskoj upravi koja je dužna o tome odmah obavijestiti nadležnu agenciju za vodno područje.

(2) Pravno ili fizičko lice iz stava (1) ovog člana dužno je vodnom inspektor ili ovlaštenom licu Agencije za vodno područje dopustiti uzimanje podataka i obavljanje potrebnih ispitivanja radi utvrđivanja ležišta, količine i kvaliteta vode, te preduzeti potrebne mjere osiguranja, koje mu naloži vodni inspektor ili ovlašteno lice.

VI. ZAŠTITA VODA

1. Zabrane i ograničenja

Član 27.

(Opća zaštita voda)

(1) Ispuštanje otpadne vode u površinske vode dozvoljeno je samo na način i pod uslovima određenim ovim Zakonom i podzakonskim propisom iz člana 29. ovog zakona.

(2) Zabranjeno je ispuštanje otpadne vode u prirodno jezero, ribnjak i drugu prirodnu vodnu akumulaciju, koja je nastala zbog vađenja ili iskorištavanja mineralne sirovine ili drugog sličnog zahvata.

(3) U prirodnom jezeru, ribnjaku, močvari i drugoj prirodnoj vodnoj akumulaciji, koja ima stalan ili povremen dotok ili isticanje površinske ili podzemne vode, zabranjeno je korištenje vode na način koji bi mogao prouzrokovati ugrožavanje njenog ekološkog ili hemijskog stanja.

(4) Ispuštanje otpadne vode direktno u podzemnu vodu je zabranjeno.

Član 28.

(Opća obaveza odvodnje i tretmana otpadnih voda)

(1) Fizičko i pravno lice je dužno otpadnu vodu ispuštati u javni kanalizacioni sistem ili na drugi način, u skladu sa odlukom o odvodnji otpadnih voda.

(2) Odluka iz stava (1) ovog člana sadrži naročito: odredbe o načinu odvodnje otpadnih voda, obavezu priklju-

čenja na javni kanalizacioni sistem, uslove i način ispuštanja otpadnih voda na područjima na kojima nije izgrađen takav sistem, obavezu posebnog odlaganja i odstranjivanja opasnih i drugih materija, te obavezu održavanja javnih kanalizacionih sistema.

(3) Odluku o odvodnji otpadnih voda na području općine donosi Općinsko vijeće, a odluku o odvodnji otpadnih voda s područja više općina, donosi Vlada Kantona.

Član 29.

(Granične vrijednosti za ispuštanje otpadnih voda)

Granične vrijednosti za ispuštanje otpadnih voda donosi Vlada Federacije BiH u skladu sa odredbom člana 55. stav 1. Federalnog zakona.

Član 30.

(Zabranu đubrenja i upotreba sredstava za zaštitu bilja)

(1) Korištenje i upotreba đubriva i sredstava za zaštitu bilja uredit će se u skladu sa odredbom člana 56. stav 1. i 2. Federalnog zakona.

(2) Zabranjena je upotreba đubriva i sredstava za zaštitu bilja na vodnom dobru.

Član 31.

(Zabranu pranja vozila)

Zabranjeno je pranje vozila u površinskoj vodi i na zemljištu koje pripada vodnom dobru.

Član 32.

(Odlaganje i deponovanje opasnih materija ili otpada)

(1) Zabranjeno je proizvoditi, rukovati, čuvati i odlagati opasne materije i otpad na vodama i vodnom dobru.

(2) Pod otpadom, u smislu ovog zakona, podrazumijevaju se materije definirane u Zakonu o upravljanju otpadom ("Službene novine Federacije BiH", broj: 33/03).

(3) Posebni uslovi za proizvodnju, rukovanje i čuvanje opasnih materija i otpada, odbranu i slične svrhe mogu se propisati u skladu sa odredbom člana 59. stav 3. Federalnog zakona.

Član 33.

(Akcidenti/Incidenti)

(1) Ako je uslijed iznenadnog slučaja, kvara ili iz drugih razloga nastala opasnost od zagađenja vode, pravno i fizičko lice, u vezi s čijim je djelovanjem ili propustom takva opasnost nastala, mora odmah poduzeti sve potrebne mjere kako bi spriječilo ili ublažilo uticaje prouzrokovane incidentom, te spriječilo ponovni nastanak incidenta, a zatim, bez odlaganja, o tome obavijestiti najbližu policijsku upravu, vodnu inspekciju, kanto-

nalnu inspekciju nadležnu za zaštitu okoline, agenciju za vodno područje ili operativni centar civilne zaštite.

(2) Svako fizičko lice koje primijeti da je došlo do situacije iz stava (1) ovog člana, dužno je o tome obavijestiti najbližu policijsku upravu, vodnu inspekciju, okolišnu inspekciju, agenciju za vodno područje ili operativni centar civilne zaštite.

(3) Policijska uprava i operativni centar civilne zaštite, po saznanju o nastalom zagađenju, odnosno opasnosti od zagađenja vode, obavještavaju najbližeg vodnog inspektora, okolišnog inspektora, odnosno mjesno nadležnu agenciju za vodno područje.

(4) Troškove preduzetih mjera (otklanjanje posljedica) snosi pravno i fizičko lice čija je radnja ili propuštanje radnje izazvalo zagađenje ili opasnost od zagađenja.

(5) Postupak i mjere koje se preduzimaju u slučaju akcidenta propisat će se u skladu sa članom 61. stav 9. Federalnog zakona.

Član 34.

(Ekološki prihvatljiv protok)

(1) Ekološki prihvatljiv protok predstavlja minimalni protok koji osigurava očuvanje prirodne ravnoteže i ekosistema vezanih za vodu.

(2) Ekološki prihvatljiv protok utvrđuje se na osnovu provedenih istražnih radova i u skladu sa metodologijom za njegovo određivanje, u skladu sa propisom iz stava (4) ovog člana.

(3) Do donošenja propisa iz stava (4) ovog člana, ekološki prihvatljiv protok utvrđuje se na osnovu hidroloških osobina vodnog tijela za karakteristične sezone, kao minimalni srednji mjesečni protok 95% od vjerovatnoće pojave.

(4) Obaveza donošenja podzakonskog akta iz stava (2) ovog člana je utvrđena u skladu sa članom 62. stav 4. Federalnog zakona.

(5) Troškove potrebnih istraživanja snosi investitor, odnosno korisnik.

Član 35.

(Vadenje materijala)

Vadenje materijala iz vodotoka dozvoljeno je u obimu i na način koji bitno ne mijenja prirodne procese, ne remeti prirodnu ravnotežu ekosistema ili ne pospješuje štetno djelovanje voda.

Član 36.

(Referentni laboratorij i ovlaštene laboratorije)

(1) Za praćenje stanja voda, verifikaciju rezultata rada ovlaštenog laboratorija i za izvršavanje zadataka iz nadležnosti Ministarstva i Ministarstva za prostorno uređenje, promet i komunikacije i zaštitu okoline, nadležan je referentni laboratorij.

(2) Ostale odredbe vezane za referentne laboratorije utvrđene su u članu 64. Federalnog zakona.

2. Zaštićena područja

Član 37.

(Vrste zaštićenih područja)

(1) U cilju osnivanja posebne zaštite površinskih i podzemnih voda, staništa biljnih i životinjskih vrsta ili akvatičnih vrsta, područja i vodna tijela mogu se proglasiti zaštićenim područjima.

(2) Zaštićena područja su:

1. područja namijenjena zahvatanju vode za piće,
2. područja namijenjena zaštiti ekonomski važnih akvatičnih vrsta,
3. površinska vodna tijela namijenjena rekreaciji, uključujući i područja određena za kupanje,
4. područja podložna eutrofikaciji i područja osjetljiva na nitrate,
5. područja namijenjena zaštiti staništa biljnih i životinjskih vrsta ili akvatičnih vrsta u kojima je održavanje ili poboljšanje stanja voda bitan uslov za njihov opstanak i reprodukciju.

Član 38.

(Područja zaštite izvorišta vode za piće)

(1) Područje na kojem se nalazi izvorište vode koje se po količini i kvalitetu može koristiti ili se koristi za javno vodosnabdijevanje mora biti zaštićeno od zagađenja i drugih nepovoljnih uticaja na zdravstvenu ispravnost vode ili izdašnost izvorišta.

(2) Na području iz stava (1) ovog člana provodi se zaštita izvorišta utvrđivanjem zona sanitarne zaštite čija se veličina, granice, sanitarni režim, mjere zaštite i drugi uslovi određuju prema propisu iz člana 66. stav 3. i 4. Federalnog zakona.

(3) Odluka o provođenju zaštite izvorišta sadrži naročito: granice zona sanitarne zaštite, sanitarne i druge uslove u pojedinim zonama i druge mjere zaštite, zabrane i ograničenja, izvore i način finansiranja za provođenje zaštitnih mjera, nazive organa i pravna lica koja će provoditi odluku, te kazne za povredu odredaba te odluke.

(4) Obaveza donošenja podzakonskog akta iz stava (2) ovog člana je utvrđena u članu 66. stav 3. Federalnog zakona.

Član 39.

(Zone sanitarne zaštite u planovima upravljanja vodama)

Zone sanitarne zaštite utvrđene odlukom o zaštiti izvorišta, kao i prostor rezervisan za uspostavljanje zona sanitarne zaštite za izvorišta koja se koriste, a za koje nije donesena odluka unose se u plan upravljanja vodama.

Član 40.

(Odluka o zaštiti izvorišta)

(1) Zone sanitarne zaštite i zaštitne mjere utvrđuje općinska služba uprave nadležna za vode (u daljem tekstu: Općinska služba) na čijem se području nalazi izvorište.

(2) Odluku o zaštiti izvorišta čije se zone sanitarne zaštite prostiru na području jedne općine donosi Općinsko vijeće.

(3) Odluku o zaštiti izvorišta čije se zone sanitarne zaštite prostiru na području više općina u sastavu Kantona donosi Vlada Kantona.

(4) Odluku o zaštiti izvorišta čije se zone sanitarne zaštite prostiru na području dvaju ili više kantona donosi Vlada Federacije na prijedlog Federalnog ministarstva.

(5) Odluka o zaštiti izvorišta iz stava (1), (2) i (3) ovog člana donosi se u skladu sa članom 66. stav 3. i 4. Federalnog zakona.

Član 41.

(Vodna tijela namijenjena rekreaciji)

(1) Kupalište je područje za javnu rekreaciju na vodi (plivanje i dr.) i područje na kome nije zabranjeno kupanje, a koje se tradicionalno koristi za tu namjenu.

(2) Kupalište proglašava nadležna općinska služba, u skladu sa propisom iz člana 72. stav 6. Federalnog zakona.

(3) Na području kupališta nije dozvoljeno postavljanje stalnih ili privremenih objekata ili drugih prepreka koje bi sprječavale slobodan protok vode, slobodan prijelaz preko vodnog dobra, odnosno sprječavale slobodan prilaz obalama i koritu vodotoka, prirodnog i vještačkog jezera.

(4) Područje iz stava (1) ovog člana mora biti zaštićeno od zagađenja i od ostalih oblika korištenja ili pojava koje mogu uticati na kvalitet vode za kupanje.

(5) Aktivnosti koje ugrožavaju ili bi mogle ugroziti zdravlje ili život kupaca su zabranjene.

(6) Kupališta iz stava (1) ovog člana unose se u plan upravljanja vodama i prostorne planove.

VII. UREĐENJE VODOTOKA I DRUGIH VODA I ZAŠTITA OD ŠTETNOG DJELOVANJA VODA

Član 42.

(Uređenje vodotoka i drugih voda)

Prema ovom zakonu, uređenje vodotoka i drugih voda je održavanje vodotoka i vodnog dobra, kao i drugi radovi kojima se omogućava kontrolisani i neškodljivi protok vode.

Član 43.
(Održavanje vodotoka, vodnog dobra i vodnih objekata)

Održavanje vodotoka, vodnog dobra, vodnih objekata i sistema obuhvata naročito:

1. rad na održavanju prirodnih i vještačkih vodotoka kao što je oblaganje korita i obala, čišćenje, uklanjanje nanosa i djelimično produbljavanje dna korita, ublažavanje zavoja bez značajnije promjene trase korita i sl.,
2. izvođenje zemljanih i sličnih radova na uređenju i održavanju obala, zemljane radove u inundacionom pojasu, krčenje i košenje rastinja, obnavljanje i održavanje propusta i prijelaza,
3. održavanje regulacijskih i zaštitnih vodnih objekata kao što je popravak, pojačanje i obnavljanje nasipa, krčenje, košenje i rad na vegetativnoj zaštiti objekata, zamjena oštećenih dijelova građevine i sl.,
4. održavanje vodnih objekata za melioracionu odvodnju kao što je čišćenje, tehničko i vegetativno održavanje objekata i pojasa uz objekte, zemljani radovi na manjim dopunama kanalske mreže, ublažavanje zavoja i nagiba, drenažni radovi, izrada tipskih propusta i sličnih objekata koji su sastavni dio kanalske mreže, njihovo obnavljanje, zamjena i sl.

Član 44.
(Planiranje i izvođenje uređenja)

Zahvati radi uređenja voda planiraju se i izvode na način koji ne utiče na pogoršanje karakteristika režima voda i bitno ne remete prirodnu ravnotežu vodnih i priobalnih ekosistema.

Član 45.
(Obaveze nadležnih nivoa vlasti)

(1) Kanton, općina i pravno lice osiguravaju uređenje vodotoka i drugih voda u skladu sa članom 4. i 5. ovog zakona, svako u okviru svoje nadležnosti.

(2) Kanton, općina i pravno lice osiguravaju izgradnju, rekonstrukciju i održavanje vodnih objekata iz članova 10. do 14. ovog zakona, svako u okviru svoje nadležnosti, na način propisan ovim Zakonom.

Član 46.
(Zaštita od štetnog djelovanja voda)

(1) Pod zaštitom od štetnog djelovanja voda podrazumijeva se provođenje aktivnosti i mjera u cilju smanjenja ili sprječavanja ugroženosti ljudi i materijalnih dobara od štetnog djelovanja voda i otklanjanje posljedica njihovog djelovanja.

(2) Zaštita od štetnog djelovanja voda odnosi se na odbranu od poplava i leda na vodotocima i zaštitu od erozije i bujica.

(3) Osim zaštite iz stava (2) ovog člana, zaštita od štetnog djelovanja voda obuhvata i mjere zaštite i otklanjanja posljedica prouzrokovanih vanrednim zagađenjem voda.

Član 47.
(Ugrožena područja)

(1) Radi smanjenja stepena ugroženosti ljudi i materijalnih dobara i radi provođenja mjera i aktivnosti zaštite od štetnog djelovanja voda, određuje se područje koje je ugroženo:

1. poplavama (u daljem tekstu: poplavno područje),
2. erozijom površinskih voda (u daljem tekstu: erozivno područje).

(2) Područja iz stava (1) ovog člana (u daljem tekstu: ugrožena područja) određuju se u skladu sa članom 86. stav 4. Federalnog zakona, uzimajući u obzir prirodne mogućnosti i uslove za nastanak štetnog djelovanja voda, broj potencijalno ugroženih stanovnika i veličinu moguće štete na zemljištu, objektima i drugim dobrima.

(3) Radi zaštite od štetnog djelovanja voda, s obzirom na stepen ugroženosti, zemljište se na ugroženom području može podijeliti na kategorije.

Član 48.
(Poplavno područje)

Poplavno područje je područje uz vodotok koje može biti poplavljeno tokom poplavnog događaja uslijed izlivanja vode iz korita, bez obzira da li je područje osigurano zaštitnim objektima.

Član 49.
(Erozivno područje)

Erozivno područje je zemljište koje je stalno ili povremeno pod uticajem površinske, dubinske ili bočne erozije vode, a koje je:

1. izvor plavina (erozivno žarište),
2. pod uticajem bujica,
3. sastavljeno od tla podložnog ispiranju.

Član 50.
(Obaveze nadležnih nivoa vlasti)

(1) U cilju zaštite od štetnog djelovanja voda, Kanton i općine na ugroženom području osiguravaju, svako u okviru svoje nadležnosti prema odredbama ovog i Federalnog zakona, planiranje mjera zaštite, gradnju i upravljanje zaštitnim vodnim objektima, a naročito gradnju nasipa, brana, pregrada, objekata za stabilizaciju dna i obala, objekata za odvođenje unutrašnjih voda i dr.

(2) Mjere i aktivnosti iz stava (1) ovog člana provode se i izvan ugroženog područja, sve do nivoa dijela riječnoga bazena na području Kantona, ako se njima povećava stepen zaštite.

(3) Ciljevi zaštite od štetnog djelovanja voda moraju biti sadržani i u drugim sektorskim planovima u skladu sa odredbama člana 42. Federalnog zakona.

(4) Mjere i aktivnosti zaštite od poplava dijele se na sljedeće faze: fazu planiranja i pripremnu fazu, fazu aktivne odbrane od poplava i fazu sanacije posljedica štetnog djelovanja voda.

Član 51.

(Obim zaštite od štetnog djelovanja voda)

(1) Obim zaštite od štetnog djelovanja voda i potrebne mjere određuju se: posebnim planovima zaštite od poplava i leda, planovima zaštite od erozije i bujica i planovima zaštite od vanrednog zagađenja voda.

(2) Kod određivanja obima zaštite iz stava (1) ovog člana u obzir se uzima naročito:

1. značaj ugroženog područja, veličina naselja, vrijednost infrastrukture ili zemljišta,
2. prirodne i socijalne prilike stanovništva na ugroženom području,
3. potrebne mjere za zaštitu, uključujući i ocjenu njihove izvodljivosti, visinu troškova te posljedice za prirodnu ravnotežu,
4. osjetljivost vodnog talasa na mogućnost iznenadnog zagađenja.

Propis o vrstama i sadržaju planova iz stava (1) ovog člana donijet će se u skladu sa članom 90. stav 3. Federalnog zakona.

Član 52.

(Faza aktivne odbrane od poplava)

(1) Za vrijeme neposredne opasnosti od pojave velikih poplavnih voda, Kanton i općina osiguravaju, svako u okviru svoje nadležnosti prema odredbama ovog zakona provođenje mjera aktivne odbrane od poplava.

(2) Mjere iz stava (1) ovog člana su naročito:

1. mjere na ugroženim područjima i zaštitnim vodnim objektima kojima se sprečava nastanak težih posljedica štetnog djelovanja voda,
2. povećan nadzor nad zaštitnim objektima i na ugroženim područjima,
3. odstranjivanje naplavina u cilju povećanja kapaciteta protočnosti riječnog korita,
4. provođenje privremenih mjera kao što je postavljanje odbrambenog nasipa, nasipanje, saniranje proboja i dr.

(3) Kod provođenja aktivne faze odbrane od poplava potrebno je poduzeti najveće moguće mjere zaštite zaštitnih vodnih objekata i uređaja, kao i najveće moguće mjere za očuvanje karakteristika ekosistema i prirodnih vrijednosti.

(4) Ministar na osnovu propisa iz člana 51. stav (3) ovog zakona, donosi plan o mjerama i načinu njihovog provođenja za područja uz površinske vode II kategorije na teritoriji Kantona.

Član 53.

(Način provođenja mjera)

Kod provođenja mjera aktivne odbrane od poplava ili kod vanrednog zagađenja, nadležni organi vlasti, pravna i fizička lica moraju postupati tako da u što manjoj mogućoj mjeri ugroze kvalitet vode i da ne oštete vodno dobro i priobalno zemljište, vodne objekte i drugu infrastrukturu, te da u najvećoj mogućoj mjeri očuvaju hidro- morfološke karakteristike vodotoka.

Član 54.

(Sanacije posljedica štetnog djelovanja voda)

(1) Sanacija posljedica štetnog djelovanja voda se izvodi na osnovu programa sanacije.

(2) Ako su posljedice štetnog djelovanja voda nastale na vodnom, priobalnom ili drugom zemljištu ili na vodnoj infrastrukturi ili drugom vodnom objektu i uređaju, koji je u vlasništvu Kantona, sredstva za njihovu sanaciju osigurava Kanton.

(3) Ako su posljedice štetnog djelovanja voda nastale na vodnom objektu ili uređaju namijenjenom za posebno korištenje vode i vodnog dobra koji nije u vlasništvu Kantona, njegovu je sanaciju dužan osigurati vlasnik ili operator.

(4) Ako lice iz stava (3) ovog člana ne osigura sanaciju, a to je značajno za funkcionisanje sistema zaštite od štetnog djelovanja voda, Ministarstvo, sanaciju osigurava na njegov teret.

(5) Bez obzira na odredbe stavova (2) do (4) ovog člana, troškove sanacije posljedica vanrednog zagađenja voda snosi pravno i/ili fizičko lice zbog čije je radnje ili propuštanja radnje nastupilo zagađenje.

(6) Program sanacije iz stava (1) ovog člana predlaže Ministarstvo, a donosi Vlada Kantona u roku od šest mjeseci od dana procjene štete i pripreme prijedloga programa sanacije. Procjenu štete i pripremu prijedloga programa sanacije vrši posebna komisija za procjenu štete, u skladu sa ovim Zakonom i propisima o zaštiti od prirodnih i drugih nesreća.

Član 55.

(Opće zabrane)

Na vodnom su dobru i priobalnom zemljištu zabranjene djelatnosti i zahvati u prostoru koji mogu:

1. ugroziti stabilnost vodnog i priobalnog zemljišta,
2. umanjiti stepen zaštite od štetnog djelovanja voda,

3. spriječiti normalan protok vode, naplavina i mulja,
4. onemogućiti opstanak i razmnožavanje vodnih i za vodu vezanih organizama.

Član 56.

(Zabrane na poplavnom području)

(1) Na poplavnom području su, osim zabrana iz člana 7. ovog zakona, izričito zabranjene i sve aktivnosti koje mogu za vrijeme poplava imati štetni uticaj na vode, vodno dobro, priobalno zemljište i zaštitne objekte, a naročito:

1. na odbrambenom nasipu, odnosno obodnom kanalu i inundacionom području kopati zemlju, saditi drveće i grmlje, pobijati kolje i druge predmete, kao i postavljati rampe, ako ovim Zakonom nije drugačije određeno;
2. na nasipu graditi objekte koji nemaju karakter zaštitnog objekta;
3. vršiti vadenje materijala (šljunka, pijeska, kamena i gline) u inundacionom području, odnosno u branjenom području na udaljenosti manjoj od 100 metara od vanjske (vodne) nožice nasipa;
4. graditi bunare na udaljenosti manjoj od 50 metara od vanjske nožice nasipa, kopati (bušiti) jame ili paralelne kanale na udaljenosti manjoj od 20 metara od unutrašnje nožice, odnosno 10 metara od vanjske nožice nasipa;
5. podizati ograde i živice i saditi drveće na udaljenosti manjoj od 20 metara s unutrašnje strane i 10 metara s vanjske strane od nožice nasipa, kao i graditi objekte (stambene, privredne i druge) s unutrašnje strane nasipa na udaljenosti manjoj od 20 metara od nožice nasipa i u inundacionom području;
6. obrađivati zemlju na udaljenosti manjoj od 10 metara od nožice nasipa;
7. podizati pregrade u inundacionom području;
8. puštati po nasipu, obodnom i odvodnom kanalu stoku radi ispaše ili prevoditi stoku izvan mjesta određenog za prelaz;
9. oštećivati ili uništavati uređaje na nasipu (rampe, oznake, vodomjere i dr.) ili uređaje za registraciju promjena na vodama ili druge znakove;
10. na nasipu i njegovom zaštitnom pojasu i u inundacionom području istovarati ili ostavljati bilo kakav materijal, izuzev materijala za odbranu od poplava (deponije kamena i zemlje);
11. oštećivati ili neovlašteno rukovati akumulacijama i njihovom opremom, crpnim stanicama, ustavama, kanalima, tunelima, kulama zatvaračnicama i njima pripadajućim objektima, dalekovodima, trafo-stanicama i sistemom veza;
12. neovlašteno koristiti pristupne puteve do zaštitnih objekata;
13. mijenjati pravac vodotoka i kanala bez vodne saglasnosti i vodne dozvole, odnosno protivno

uslovima određenim u vodnoj saglasnosti i vodnoj dozvoli;

14. unositi u vodotoke, jezera, akumulacije i retezije, kao i deponovati na obale vodotoka, jezera, akumulacija i retenzija: kamen, zemlju, jalovinu i druge krute i tečne materije i materijale;
15. saditi drveće na udaljenosti manjoj od 10 metara od linije dopiranja velikih voda vodotoka, odnosno 10 metara od rubne linije akumulacije ili retenzije, obodnog ili vještačkog kanala, izuzev zaštitnih šuma;
16. podizati zgrade i druge objekte koji ne služe odbrani od poplava i koji sprječavaju prilaz vodotoku na udaljenosti manjoj od 10 metara od linije dopiranja velikih stogodišnjih voda za sve površinske vode, izuzev ako je vlasniku ili korisniku uslovljena izgradnja objekata prethodnim preduzimanjem zaštitnih mjera kojima se onemogućuju ili smanjuju štetne posljedice voda;
17. vršiti radnje koje mogu oštetiti korito i obale vodotoka, jezera, odnosno korito kanala, korito i obale akumulacije ili retenzije ili tunela ili smetati slobodnom oticanju vode;
18. izvoditi radove u blizini vodotoka, jezera, kanala, tunela, akumulacije i retenzije, koji bi mogli ugroziti stabilnost zaštitnih vodnih objekata ili njihovu upotrebu (kopanje šljunka, pijeska, kamena i sl.).

(2) Zabranjeno je, bez pisane saglasnosti nadležnog organa za vode:

1. u inundacionom području saditi drveće i grmlje, sjeći drveće i krčiti rastinje;
2. u inundacionom području sjeći zaštitne šume ili drugo drveće i vršiti druge radove koji mogu dovesti do erozivnih procesa;
3. vršiti promet vozilima po odbrambenim nasipima.

Član 57.

(Zabrane na erozivnom području)

- (1) Na erozivnom području je zabranjeno:
1. izvoditi građevinske i druge zahvate u prostoru na način koji pospješuje eroziju i nastanak bujica,
 2. ogoljevanje površina,
 3. krčenje šumskih površina koje spriječavaju klizanje zemljišta i snježne naslage, izravnavaju protoke ili na drugi način štite nizvodna područja od štetnih uticaja erozije,
 4. zatrpavanje izvora,
 5. skupljanje ili odvođenje sabranih voda preko erozivnih ili kliznih zemljišta bez nadzora,
 6. ograničavanje protoka vodenih bujica, jačanje erozivne snage vode i slabljenje uravnoteženih odnosa,

7. izvlačenje, odlaganje ili skladištenje drva i drugih materijala,
8. zatrpavanje otkopanim ili otpadnim materijalom,
9. skupljanje naplavina s dna i korita, osim za osiguranje protočne moći korita bujica.

(2) Uslovi za zahvat u prostoru na ugroženom području detaljno se određuju vodnim aktima, u skladu sa odredbama iz člana 67. stav (2) tačka 3. ovog zakona.

VIII. INFORMACIONI SISTEM VODA

Član 58.

(Ciljevi uspostave Informacionog sistema voda)

(1) Opći ciljevi uspostave Informacionog sistema voda (u daljem tekstu: ISV) su:

1. racionalizacija, integracija i optimizacija odlučivanja u sektoru voda, kroz proces korištenja informacione i komunikacione tehnologije,
2. razmjena i objedinjavanje informacija interno - unutar sektora voda i eksterno - s vanjskim i međunarodnim institucijama.

(2) Posebni ciljevi uspostave ISV su:

1. unaprjeđenje tačnosti i pouzdanosti informacija iz sistema upravljanja vodama,
2. skraćivanje vremena dostupnosti informacija sistemu upravljanja vodama,
3. uspostavljanje osnove za kontinuirano praćenje promjena sistema upravljanja vodama,
4. racionalno korištenje i zaštita vodnih resursa,
5. povećanje kvalitete u donošenju razvojnih odluka,
6. povećanje intelektualnog kapitala,
7. promocija pozitivne slike o upravljanju vodama, zasnovane na profesionalnom i odgovornom radu.

Član 59.

(Vođenje informacionog sistema voda)

Za potrebe vođenja informacionog sistema voda na području Kantona vodi se:

- vodni katastar,
- vodna knjiga,
- evidencija o izdatim koncesijama na vodama i vodnom dobru,
- evidencija o inspekcijskim pregledima,
- i ostala dokumentacija.

Član 60.

(Vodna knjiga)

(1) U vodnoj knjizi evidentiraju se svi podaci o izdatim vodnim aktima i nalozima.

(2) Vodna knjiga sastoji se od upisnika, zbirke isprava i tehničke dokumentacije.

(3) Vodnu knjigu vode Ministarstvo i općinska služba nadležni za izdavanje vodnih akata.

(4) Ministarstvo, odnosno općinska služba dužni su dostaviti kopiju izdatog vodnog akta mjesno nadležnoj agenciji za vode.

Član 61.

(Evidencija koncesija na vodama i vodnom dobru)

(1) Evidencija izdatih koncesija na vodama i vodnom dobru sadrži podatke o odlukama i ugovorima o koncesijama na vodama i vodnom dobru.

(2) Ministarstvo je dužno dostaviti kopiju dokumentacije o dodjeli koncesije nadležnoj agenciji za vode.

Član 62.

(Evidencija inspekcijskih pregleda)

Vodna inspekcija dužna je dostaviti kopiju predmeta o inspekcijskom pregledu nadležnoj agenciji za vodno područje.

Član 63.

(Obaveza ustupanja podataka za ISV)

Ministarstvo, općinska služba i druge institucije nadležne za vode, kao i organi, institucije i druga fizička i pravna lica koja posjeduju podatke značajne za upravljanje vodama imaju obavezu ustupiti te podatke mjesno nadležnoj agenciji za vodno područje bez naknade.

Član 64.

(Pristup informacijama ISV)

(1) Agencija za vodno područje na zahtjev Ministarstva i općinske službe daje traženu informaciju iz ISV bez naknade.

(2) Agencija za vodno područje na zahtjev pravnog ili fizičkog lica izdaje traženu informaciju iz ISV uz naknadu, u skladu sa Zakonom o slobodi pristupa informacijama u Federaciji Bosne i Hercegovine ("Službene novine Federacije BiH", broj 32/01).

IX. VODNI AKTI

Član 65.

(Vrste vodnih akata)

(1) Radi osiguranja upravljanja vodama i osiguranja pravičnog pristupa vodi svim pravnim i fizičkim licima ovim se zakonom propisuje način ostvarivanja prava na vodu izdavanjem vodnih akata.

(2) Vodni akti u smislu ovog zakona su:

1. prethodna vodna saglasnost,
2. vodna saglasnost i
3. vodna dozvola.

(3) Vodni akti su upravni akti i izdaju se u obliku rješenja, ako ovim zakonom nije drugačije propisano.

(4) Postupak izdavanja vodnih akata provodi se prema pravilima utvrđenim ovim zakonom, uz supsidijarnu primjenu Zakona o upravnom postupku ("Službene novine Federacije BiH", broj: 2/98 i 48/99).

(5) Shodno odredbi člana 107. stav 4. Federalnog zakona donijet će se propis o sadržaju, obimu, uslovima, načinu izdavanja, čuvanja i drugim pitanjima od značaja za akte iz stava (2) ovog člana.

Član 66.

(Sadržaj vodnog akta)

Vodni akt sadrži naročito:

1. ime, odnosno naziv fizičkog, odnosno pravnog lica i podatke za kontakt s podnosiocem zahtjeva i nosiocem prava iz akta, kao i kratku oznaku predmeta postupka,
2. opis mjesta, vrstu, obim i namjenu prava iz akta,
3. vremensko važenje akta,
4. rok za početak aktivnosti iz akta koji se izdaje, koji može biti najviše tri godine,
5. rok za završetak aktivnosti iz akta koji se izdaje, koji može biti najviše pet godina,
6. uslove za sprečavanje ili ublažavanje negativnih uticaja,
7. iznos troškova postupka,
8. pouku o pravnom lijeku.

Član 67.

(Aktivnosti za koje su uvijek potrebni vodni akti)

(1) Prethodna vodna saglasnost, vodna saglasnost i vodna dozvola moraju se pribaviti, bez obzira na njihove uticaje za sljedeće aktivnosti:

1. zahvatanje vode u svim privrednim granama i djelatnostima, a naročito za:
 - industriju i energetiku,
 - poljoprivredu,
 - vodosnabdijevanje,
 - uslužne djelatnosti koje u tehnološkom postupku koriste vodu,
 - turističke djelatnosti;
2. ispuštanje otpadnih voda u površinske vode;
3. indirektno ispuštanje otpadnih voda u podzemne vode;
4. vještačko prihranjivanje podzemnih voda;
5. vađenje materijala iz vodotoka;
6. izgradnju objekata za iskorištavanje hidroenergije;

7. trajno podizanje razine vode i kao rezultat toga, plavljenje normalno suhog zemljišta;
8. izgradnju objekata za zaštitu od poplava;
9. izgradnju saobraćajnica (cestovnih i željezničkih), uključujući i šumske puteve;
10. izgradnju mostova ili drugih objekata iznad vodotoka ili u vodotoku;
11. izgradnju ili uređenje deponija otpada;
12. pokretanje postupka izdavanja koncesija na vodama i vodnom dobru;
13. za promet opasnih materija kao i proizvoda od tih materija koji nakon upotrebe dospijevaju u vode;
14. uređenje vodotoka.

(2) Pored aktivnosti iz stava (1) ovog člana, prethodna vodna saglasnost, vodna saglasnost i vodna dozvola izdaju se i za aktivnosti koje mogu:

1. privremeno ili trajno degradirati kvalitet voda, ili ometati poboljšanje njihovog postojećeg kvaliteta;
2. štetno uticati na akvatične i poluakvatične ekosisteme;
3. povećati rizik od poplave ili erozije;
4. značajno smanjiti kvantitet voda, promijeniti morfologiju vodotoka, ometati korištenje površinskih voda za rekreaciju i dr.

(3) Aktivnosti iz stava (2) ovog člana detaljnije se definiraju propisom iz člana 65. stav (4) ovog zakona.

Član 68.

(Objekti i aktivnosti za koje nisu potrebni vodni akti)

(1) Vodni akti nisu potrebni za korištenje vode koje ne prelazi obim opće upotrebe vode iz člana 21. ovog zakona.

(2) Vodni akti nisu potrebni za gašenje požara i poduzimanje hitnih sanitarnih i drugih mjera u slučaju opće opasnosti.

(3) Vodni akti nisu potrebni za objekte i aktivnosti koji ne podliježu obavezi pribavljanja okolinske dozvole, u smislu odredaba Zakona o zaštiti okoline ("Službene novine Federacije BiH", broj: 33/03), a koji vodu za vršenje privredne ili obrtničke djelatnosti osiguravaju priključkom na javni vodovodni sistem i ispuštanje otpadnih voda vrše u javni kanalizacioni sistem, prema odobrenju operatora tih sistema.

(4) Vodne akte nije potrebno pribaviti ni za građenje novih i rekonstrukciju postojećih stambenih objekata koji se snabdijevaju vodom priključkom na javni vodovodni sistem, a ispuštanje otpadnih voda vrše u javni kanalizacioni sistem ili vodonepropusnu septičku jamu bez preljeva.

(5) Odredbe stavova (3) i (4) ovog člana ne odnose se na objekte koji svojim gabaritom i načinom fundiranja utiču na režim podzemnih voda.

(6) Operator vodovodnog, odnosno kanalizacionog sistema ne može izdati odobrenje za priključak na vodovodni sistem, odnosno na kanalizacioni sistem fizičkim i pravnim licima iz stavova (3) i (4) ovog člana, ako sam za taj sistem ne posjeduje vodnu dozvolu.

(7) Sadržaj odobrenja iz stava (3) ovog člana utvrdit će se propisom iz člana 110. stav 7. Federalnog zakona.

Član 69.

(Prethodna vodna saglasnost)

(1) Prethodnom vodnom saglasnošću odlučuje se o postojanju uslova za ostvarivanje prava na vodu podnosioca zahtjeva, kao i način ostvarivanja tog prava, te uslovi kojima mora udovoljiti dokumentacija za građenje novih, rekonstrukciju ili uklanjanje postojećih objekata i druge aktivnosti koje se ne smatraju građenjem, a mogu trajno, povremeno ili privremeno uticati na promjenu režima voda.

(2) Prethodna vodna saglasnost iz stava (1) ovog člana pribavlja se u postupku izdavanja okolinske dozvole, urbanističke saglasnosti za objekte i aktivnosti za koje nije potrebna okolinska dozvola i u postupku izdavanja koncesije na vodama i vodnom dobru.

(3) Za objekte ili radove za koje je pribavljena prethodna vodna saglasnost iz stava (1) ovog člana, a za koje nije podnesen zahtjev za izdavanje vodne saglasnosti, prethodna vodna saglasnost prestaje važiti istekom roka od tri godine.

Član 70.

(Prethodna vodna saglasnost i okolinska dozvola)

(1) Okolinska dozvola za pogone i postrojenja za koje je neophodno pribaviti okolinsku dozvolu, u skladu sa Zakonom o zaštiti okoline, izdaje se na osnovu prethodne vodne saglasnosti za objekte za koje je ovim zakonom propisana obaveza pribavljanja prethodne vodne saglasnosti.

(2) Zahtjev za izdavanje prethodne vodne saglasnosti iz stava (1) ovog člana podnosi organ nadležan za izdavanje okolinske dozvole.

(3) Za pogone, postrojenja i aktivnosti koji prije dobivanja okolinske dozvole moraju proći proceduru procjene uticaja na okolinu, organ nadležan za izdavanje vodnih akata učestvuje u postupku procjene uticaja na okolinu, na zahtjev organa koji vodi postupak procjene uticaja na okolinu.

(4) Za pogone, postrojenja ili aktivnosti koji moraju proći proceduru procjene uticaja na okolinu, uz zahtjev iz člana 78. stav (1) ovog zakona podnosi se i studija o uticaju na okolinu, u skladu sa odredbama Zakona o zaštiti okoline.

Član 71.

(Prethodna vodna saglasnost i koncesije)

(1) Organ nadležan za izdavanje koncesije za korištenje vode i vodnog dobra obavezan je, prije pokretanja postupka za dodjelu koncesije, pribaviti prethodnu vodnu saglasnost od nadležnog organa.

(2) Prethodna vodna saglasnost iz stava (1) ovog člana se, nakon provođenja postupka dodjele koncesije, prenosi na pravno lice koje je dobilo koncesiju.

(3) Pravno lice iz stava (2) ovog člana dužno je pribaviti ostale vodne akte, u skladu sa odredbama ovog zakona.

Član 72.

(Vodna saglasnost)

(1) Vodnom saglasnošću utvrđuje se da je dokumentacija priložena uz zahtjev za izdavanje vodne saglasnosti u skladu sa prethodnom vodnom saglasnošću, propisima o vodama i planskim dokumentima.

(2) Odobrenje za građenje novih ili rekonstrukciju postojećih objekata, u smislu propisa o prostornom uređenju, izdaje se po izdatoj vodnoj saglasnosti za objekte za koje je ovim zakonom propisana obaveza pribavljanja vodne saglasnosti.

(3) Vodna saglasnost se izdaje u skladu sa odredbama člana 78. ovog zakona, uz ovjeru dokumentacije za građenje čime se potvrđuje da je ta dokumentacija urađena u skladu sa prethodnom vodnom saglasnošću. Ovjera se vrši upisivanjem broja i stavljanjem otiska pečata organa nadležnog za izdavanje vodnog akta na tu dokumentaciju.

(4) Vodna saglasnost se neće izdati ako dokumentacija za građenje ili druge aktivnosti nisu urađene u skladu sa prethodnom vodnom saglasnošću.

(5) Za izuzetne slučajeve, za koje nije potrebna vodna dozvola, prema odredbama člana 73. stav (1) ovog zakona, sastavni dio vodne saglasnosti su uslovi za uređenje lokaliteta i predmetne dionice vodotoka.

(6) Vodna saglasnost prestaje da važi istekom roka od dvije godine od dana njezinog izdavanja, ukoliko do toga dana nije pribavljeno odobrenje za građenje i nisu započeti radovi.

Član 73.

(Vodna dozvola)

(1) Vodna dozvola potrebna je za sve objekte i aktivnosti za koje je ovim zakonom propisano izdavanje vodne saglasnosti, izuzev za vadenje materijala iz vodotoka iz člana 35. i uređenje vodotoka iz člana 42. ovog zakona.

(2) Ako se zbog promjene u tehnologiji ili iz drugih razloga, naknadno izmijeni obim i uslovi korištenja vode, odnosno ispuštanje otpadnih voda u površinske vode, potrebna je nova vodna dozvola.

Član 74.

(1) Vodnom dozvolom utvrđuje se namjena, način i uslovi iskorištavanja vode, režim rada objekata i postrojenja, način i uslovi ispuštanja otpadnih voda, način i uslovi odlaganja krutog i tečnog otpada i drugi uslovi.

(2) Vodnom dozvolom utvrđuje se da su ispunjeni uslovi određeni vodnom saglasnošću i da je uz zahtjev za izdavanje vodne dozvole priložen opći akt iz člana 14. stav (6) ovog zakona, koji se donosi prije izdavanja vodne dozvole.

Član 75.

(1) Vodna dozvola izdaje se na određeno vrijeme, a najduže do 15 godina.

(2) Izdavanje vodne dozvole prethodi izdavanju upotrebne dozvole u smislu propisa o građenju.

Član 76.

(1) Vodna dozvola prestaje važiti:

1. istekom roka važnosti vodne dozvole,
2. korisnikovim odricanjem od prava iz vodne dozvole,
3. nekorištenjem prava iz vodne dozvole bez opravdanih razloga duže od dvije godine,
4. smrću fizičkog lica, odnosno prestankom rada pravnog lica.

(2) Rješenje o utvrđivanju prestanka prava, u smislu odredbe iz stava (1) ovog člana, donosi organ koji je izdao vodnu dozvolu.

(3) U slučaju iz stava (1) tačka 1. ovog člana vodna se dozvola može produžiti na zahtjev korisnika.

Član 77.**(Obaveze budućeg imalaca prava na korištenje voda)**

(1) Vodnim se aktom može odrediti da budući imalac prava na korištenje voda mora kod planiranja, izgradnje i rada objekta, omogućiti i korištenje toga objekta za zaštitu od štetnog djelovanja voda.

(2) Vodnim se aktom može odrediti da budući imalac prava na korištenje voda mora omogućiti korištenje vodnog objekta za opću upotrebu vode ili za snabdijevanje vodom za piće, ako to bitno ne pogoršava uslove ostvarivanja njegovog prava.

Član 78.**(Zahtjev za izdavanje vodnog akta)**

(1) Vodni akt izdaje se na pisani zahtjev investitora, odnosno korisnika, organa nadležnog za izdavanje urbanističke saglasnosti po propisima o prostornom uređenju, organa nadležnog za izdavanje okolinske dozvole i organa nadležnog za koncesije.

(2) Uz zahtjev za izdavanje vodnog akta dostavljaju se potrebni podaci o lokalitetu, vrsti i obimu aktivnosti koja se namjerava provesti i tehnička dokumentacija kojom se obrađuje konkretna aktivnost. Vrsta i sadržaj podataka i dokumentacije određuje se propisom iz člana 65. stav (5) ovog zakona.

(3) Vodne akte izdaje nadležni organ iz člana 96. ovog zakona.

(4) Dokumentaciju koja se podnosi uz zahtjev za izdavanje vodnog akta izrađuje pravno lice registrovano za tu djelatnost.

(5) Obaveza donošenja podzakonskog akta kojim se propisuju uslovi i kriteriji koje mora ispunjavati pravno lice iz stava (4) ovog člana utvrđena je u članu 120. stav 6. Federalnog zakona.

Član 79.**(Dodatni zahtjevi prema podnosiocu zahtjeva)**

(1) Zavisno od prirode aktivnosti i njenim očekivanim uticajima, organ nadležan za izdavanje vodnih akata može zahtijevati dodatne podatke i dopunu dokumentacije.

(2) Dodatne podatke ili dopunu dokumentacije organ iz stava (1) ovog člana dužan je zatražiti u pisanom obliku s navođenjem dokumentacije i podataka koji se traže, uz upozorenje podnosiocu zahtjeva o posljedicama koje će nastupiti ako zahtjev ne bude ispunjen. Tražena dokumentacija i podaci dostavljaju se u roku koji odredi organ koji vodi postupak.

(3) Ako investitor, korisnik ili nadležni organ iz člana 78. stav (1) ovog zakona ne dostavi dokumentaciju u roku koji mu odredi organ koji vodi postupak, zahtjev za izdavanje vodnog akta će se odbaciti zaključkom protiv kojeg je dopuštena posebna žalba.

Član 80.**(Stručno mišljenje agencije za vode)**

(1) Ministarstvo ili općinska služba nadležna za izdavanje vodnih akata, u postupku izdavanja vodnog akta iz svoje nadležnosti, mogu zatražiti stručno mišljenje nadležne agencije za vodno područje.

(2) Propisom iz člana 65. stav (4) ovog zakona uređuje se postupak izdavanja stručnog mišljenja iz stava (1) ovog člana.

Član 81.**(Obavještanje zainteresiranih strana i javnosti)**

(1) Radi osiguranja učešća javnosti u radu i rješavanja mogućeg sukoba interesa, nadležni organ iz člana 96. ovog zakona prije izdavanja prethodne vodne saglasnosti obavezno o zahtjevu obavještava zainteresirane strane i javnost na području riječnog sliva, putem obavijesti na oglasnoj tabli organa nadležnog za izdavanje vodnih

akata i oglašavanjem u lokalnom sredstvu javnog informisanja.

(2) Javni oglas iz stava (1) ovog člana sadrži informacije propisane podzakonskim aktom iz člana 65. stav (4) ovog zakona.

(3) Nadležni organ iz člana 96. ovog zakona dužan je zainteresiranim stranama i javnosti odrediti rok za pisano izjašnjenje o predloženim aktivnostima iz zahtjeva koji ne može biti duži od 30 dana od dana javnog obavještanja, odnosno od dana dostave obavještenja o vođenju postupka.

(4) Nadležni organ iz člana 96. ovog zakona može, prema slobodnoj ocjeni, organizovati javnu raspravu o pitanju iz stava (1) ovog člana.

(5) Na poziv nadležnog organa koji izdaje okolinsku dozvolu za učešće na javnoj raspravi, organ koji je izdao prethodnu vodnu saglasnost učestvuje u javnoj raspravi.

Član 82.

(Izjašnjenje podnosioca zahtjeva)

(1) Podnosilac zahtjeva ima pravo pismeno se izjasniti o mišljenju nadležnog organa i o primjedbama i mišljenjima dostavljenim u postupku izjašnjenja javnosti, zainteresiranih strana i javne rasprave.

(2) Izjašnjenje iz stava (1) ovog člana podnosilac zahtjeva dostavlja u roku koji određuje organ koji vodi postupak. Propuštanje izjašnjenja u datom roku ne odlaže vođenje postupka.

Član 83.

(Dostavljanje odluke i obavještanje)

(1) Rješenje izdatog vodnog akta mora biti dostupno zainteresovanim stranama i javnosti na njihov zahtjev.

(2) Izdati vodni akt nadležni organ iz člana 96. ovog zakona dostavlja podnosiocu zahtjeva.

(3) Na izdati vodni akt podnosilac zahtjeva i zainteresirana strana imaju pravo žalbe.

(4) Izdati vodni akt nadležni organ iz člana 96. ovog zakona objavljuje na način utvrđen podzakonskim propisom iz člana 65. stav (4) ovog zakona.

Član 84.

(Troškovi postupka)

(1) Troškove postupka izdavanja vodnog akta snosi podnosilac zahtjeva.

(2) O troškovima postupka iz stava (1) ovog člana nadležni organ iz člana 96. ovog zakona odlučuje posebnim zaključkom.

Član 85.

(Dodatni uslovi u izdatom vodnom aktu)

Nadležni organ iz člana 96. ovog zakona može u izdatom vodnom aktu propisati i posebne uslove radi

sprečavanja ili ublažavanja negativnih uticaja uzrokovanih aktivnošću koja je predmet akta, radi obaveze zaštite objekta koji je predmet vodnog akta od štetnog djelovanja voda i sl.

Član 86.

(Vremensko važenje vodnog akta)

(1) Vodni akti izdaju se na određeno vrijeme utvrđeno odredbama ovog zakona. Zavisno od tehnološke složenosti objekta, vodna dozvola se može izdati i na kraće razdoblje od vremena utvrđenog u članu 75. stav (1) ovog zakona.

(2) Ako je vodna dozvola izdata na razdoblje duže od pet godina, utvrđeni uslovi iz dozvole moraju se preispitati svakih pet godina. Organ koji je izdao dozvolu po službenoj dužnosti pokreće postupak preispitivanja uslova iz dozvole, uz zahtjev korisniku da u određenom roku dostavi neophodnu dokumentaciju.

(3) Ukoliko korisnik ne postupi po zahtjevu organa, nadležni organ iz člana 96. ovog zakona ukida izdatu vodnu dozvolu.

Član 87.

(Izmjene vodnih akata)

(1) Nadležni organ iz člana 96. ovog zakona može izmijeniti ranije izdati vodni akt ako:

1. je izmjena potrebna radi osiguranja opskrbe vodom za piće iz člana 22. stav (2) ovog zakona,
2. su uticaji aktivnosti koja je predmet vodnog akta bitno drugačiji od onih koji su procijenjeni prilikom izdavanja vodnog akta,
3. bi, zbog uvođenja naprednije tehnologije, uticaji aktivnosti mogli biti bitno smanjeni, bez prevelikih troškova po korisnika,
4. je izmjena potrebna radi izvršavanja međunarodnih ugovora koje zaključuje Bosna i Hercegovina.

(2) Izmjene iz stava (1) ovog člana nadležni organ ne može izvršiti, ako bi one spriječile ili znatno ometale nastavak izvođenja aktivnosti.

(3) Zahtjev za izmjenu vodnog akta može podnijeti organ inspekcije, nosilac prava iz vodnog akta ili zainteresirana strana. Organ koji izdaje vodni akt izmjenu akta pokreće po službenoj dužnosti.

(4) Zahtjev za izmjenu vodnog akta rješava se po istom postupku kao i zahtjev za njegovo izdavanje.

Član 88.

(Privremeno ograničenje i prilagođavanje prava na korištenje voda)

(1) Za osiguranje potrebnih količina i kvaliteta vode i očuvanja prirodne ravnoteže vodnih i o vodi ovisnih ekosistema u slučaju prirodne pojave koja prouzrokuje privremeni nedostatak vode ili nastupi opasnost od štetnog

djelovanja voda, može se posebnim rješenjem imaoocu prava na korištenje vode privremeno ograničiti, ili obustaviti ili utvrditi obavezu da tehničkim ili drugim mjerama u određenom periodu prilagodi ostvarivanje prava na korištenje vode na određenom području.

(2) Osim ograničenja iz stava (1) ovog člana može se na određenom području privremeno ograničiti ili privremeno obustaviti provođenje prava na korištenje vode, ako dođe do ekološke nesreće, većeg oštećenja na vodnim objektima, ili drugih događaja koji prouzrokuju nedostatak vode ili nastupi opasnost od štetnog djelovanja voda.

(3) Kod ograničenja ili prekida korištenja vode iz stavova (1) i (2) ovog člana prioritet ima osiguranje vode za piće i vode za zaštitu od požara.

(4) Ako imalac prava na korištenje ne poštuje ograničenja iz stavova (1) i (2) ovog člana, djelimično ili u cijelosti mu se oduzima pravo na korištenje vode.

(5) Zbog privremenog ograničenja ili privremenog prekida ostvarivanja prava na korištenje vode iz stavova (1) i (2) ovog člana, imalac prava nema pravo na naknadu štete.

(6) Bez obzira na odredbe iz stava (5) ovog člana, imalac prava na korištenje vode može zahtijevati naknadu štete neposredno od osobe koja je prouzrokovala ekološku nesreću, oštećenje vodnog objekta ili drugog događaja iz stava (2) ovog člana.

(7) Odredbe iz stavova (1) i (2) ovog člana ne odnose se na imaooca prava na korištenje vode za snabdijevanje stanovništva vodom za piće.

(8) O oduzimanju prava iz stava (4) ovog člana odlučuje organ koji je izdao vodni akt.

Član 89.

(Nalog)

(1) Ako u roku važenja vodnog akta nastupi okolnost iz člana 88. stavova (1) i (2) ovog zakona, organ nadležan za izdavanje vodnog akta može, radi usklađivanja postupanja s novonastalim uslovima, izdati nalog.

(2) Nalogom iz stava (1) ovog člana nalaže se korisniku da u određenom roku izvrši neku radnju, izvrši ulaganja ili se uzdrži od nekog činjenja radi uklanjanja opasnosti od prijetjećeg ili već nastalog poremećaja režima voda.

(3) Na oblik i način izdavanja naloga se na odgovarajući način primjenjuju odredbe o rješenju u upravnom postupku, ako ovim zakonom nije drugačije određeno.

Član 90.

(Izdavanje naloga)

(1) Nalog izdaje isključivo organ koji je izdao vodni akt.

(2) Primjerak naloga dostavlja se kantonalnoj, odnosno općinskoj vodnoj inspekciji.

Član 91.

(Prigovor na nalog)

(1) Protiv naloga može se, u roku od sedam dana od dana prijema rješenja, izjaviti prigovor organu koji je izdao nalog.

(2) Prigovor ne odlaže izvršenje izdatog naloga.

(3) Rok za donošenje rješenja po prigovoru na izdati nalog je 15 dana od dana podnošenja prigovora.

Član 92.

(Oduzimanje vodnog akta)

(1) Pravnom licu može se trajno ili privremeno oduzeti vodni akt.

(2) Rješenje o trajnom ili privremenom oduzimanju vodnog akta donosi organ koji je izdao vodni akt.

Član 93.

(Privremeno oduzimanje)

(1) Vodni akt oduzet će se privremeno kada korisnik u roku određenom u nalogu ne obavi radnju, ne izvrši ulaganje ili se ne uzdrži od činjenja naloženog u nalogu i ako zbog neizvršenja naloga ne nastupi direktna opasnost po život i zdravlje ljudi ili poremećaj u privredi.

(2) Vodni se akt može privremeno oduzeti na vrijeme do šest mjeseci u kom roku se korisniku obustavlja pravo koje je stekao na osnovu vodnog akta i u kom roku je korisnik dužan da izvrši radnju zbog koje mu je privremeno oduzet vodni akt.

Član 94.

(Trajno oduzimanje)

Vodni akt oduzima se trajno, ako:

1. u određenom roku korisnik ne obavi radnju, ne izvrši ulaganje ili se ne uzdrži od činjenja naloženog u nalogu zbog čega mu je vodni akt privremeno oduzet,
2. bi neizvršenjem naloga mogla nastupiti ili je nastupila teška i direktna opasnost za život ili zdravlje ljudi, ili ako je došlo do poremećaja u privredi,
3. je podnosilac zahtjeva dao netačne podatke koji su nadležni organ doveli u zabludu u pogledu činjenica odlučujućih za izdavanje vodnog akta,
4. su uslovi iz vodnog akta bitno prekršeni uprkos pisanom upozorenju od organa inspekcije,

5. se aktivnost ne vrši u periodu od dvije uzastopne godine,
6. aktivnost uzrokuje uticaje koji su zabranjeni ovim zakonom, a ti uticaji ne mogu biti spriječeni ili ublaženi izmjenama vodnog akta u skladu sa odredbama člana 87. stav (1) ovog zakona.

Član 95.

(Postupak oduzimanja vodnog akta)

(1) Zahtjev za oduzimanje vodnog akta podnosi organ inspekcije ili nadležni organ iz člana 96. ovog zakona po službenoj dužnosti.

(2) Nadležni organ iz stava (1) ovog člana obavještava nosioca prava iz vodnog akta o podnesenom zahtjevu za oduzimanje vodnog akta. Nosioc prava iz vodnog akta dužan je dati odgovor na obavijest.

(3) Nosioc prava iz vodnog akta kome je oduzet vodni akt može zatražiti izdavanje novog vodnog akta, ako ispunji potrebne uslove utvrđene propisom iz člana 65. stav (4) ovog zakona.

(4) Rješenje o trajnom oduzimanju vodnog akta dostavlja se kantonalnom i općinskom organu nadležnom za prostorno uređenje i zaštitu okoline.

Član 96.

(Podjela nadležnosti izdavanja vodnih akata)

(1) Ministarstvo je nadležno za izdavanje vodnih akata iz člana 65. ovog zakona za:

1. zahvatanje vode u količini od 5 do 10 litara u sekundi;
2. vađenje materijala iz površinskih voda II kategorije;
3. izgradnju hidroelektrane za proizvodnju električne energije, kada je postrojenje locirano na površinskim vodama II. kategorije, snage do 5 MW;
4. formiranje akumulacije koja je locirana na površinskim vodama II kategorije i nalazi se na području Kantona;
5. izgradnju objekata za zaštitu od poplava na površinskim vodama II kategorije, ako te aktivnosti ne utječu na površinske vode I kategorije.

(2) Općinska služba izdaje vodne akte iz člana 65. ovog zakona za:

1. zahvatanje vode u količini do 5 litara u sekundi;
2. ispuštanje otpadnih voda za naselja koja imaju do 2.000 stanovnika;
3. izgradnju objekata za zaštitu od poplava na površinskim vodama II kategorije izuzev slijedećih vodotoka: Stavnja, Lašva, Ribnica, Trstionica, Gostović, Fojnica, Babina rijeka, Kočeva,

Bistrička rijeka, Papratnica, Liješnica i Jablanica.

Član 97.

(1) Protiv rješenja o izdavanju vodnih akata iz člana 65., a u vezi sa članom 96. stav (1) ovog zakona dozvoljena je žalba. Po žalbi odlučuje organ određen zakonom Kantona.

(2) Protiv rješenja o izdavanju vodnih akata iz člana 65., a u vezi sa članom 96. stav (2) ovog zakona dozvoljena je žalba. Po žalbi odlučuje Ministarstvo.

X. OGRANIČENJA PRAVA VLASNIKA I KORISNIKA ZEMLJIŠTA

Član 98.

(Služnosti)

Za ustanovljavanje prava služnosti radi provođenja ovog zakona primjenjuju se odredbe Zakona o vlasničko-pravnim odnosima ("Službene novine Federacije BiH", broj: 6/98 i 29/03), Zakona o upravnom postupku, te odredbe o služnostima i propisa o građenju i eksproprijaciji.

Član 99.

(Pravo prijelaza preko zemljišta)

Vlasnik, odnosno korisnik zemljišta dužan je dopustiti prijelaz preko zemljišta licima koja su ovlaštena da istražuju, premjeravaju, snimaju ili obilježavaju vodno dobro ili vode, kao i licima koja izvode radove na izgradnji, rekonstrukciji ili održavanju vodnih objekata ili postrojenja iz člana 9. ovog zakona.

Član 100.

(Rješenje o privremenom zauzimanju zemljišta)

(1) Ako vlasnik, odnosno korisnik zemljišta ne postupi u skladu sa odredbom iz člana 99. ovog zakona, rješenje o privremenom korištenju zemljišta donosi općinski organ uprave nadležan za imovinsko-pravne poslove, najkasnije u roku od osam dana od dana podnošenja zahtjeva.

(2) Žalba protiv rješenja iz stava (1) ovog člana ne odlaze izvršenje rješenja.

Član 101.

(Privremeno korištenje zemljišta radi zaštite od voda)

(1) Vlasnik, odnosno korisnik zemljišta na ugroženom području iz člana 47. stav (1) ovog zakona dužan je dozvoliti privremeno korištenje tog zemljišta za provođenje mjera i aktivnosti zaštite iz članova 46. i 52. ovog zakona.

(2) Izvođač radova dužan je kod provođenja mjera i aktivnosti iz stava (1) ovog člana u što manjoj mjeri uticati na stanje zemljišta, a po prestanku opasnosti od štetnog djelovanja voda nastalu štetu otkloniti.

Član 102.

(1) Ako vlasnik, odnosno korisnik zemljišta iz člana 101. stav (1) ovog zakona ne dozvoli privremeno korištenje tog zemljišta, rješenjem općinskog organa uprave nadležnog za imovinsko-pravne poslove naložit će mu se da postupi u skladu sa odredbama člana 101. stav (1) ovog zakona.

(2) Žalba protiv rješenja iz stava (1) ovog člana ne odlaže izvršenje rješenja.

Član 103.

(Korištenje materijala za odbranu od poplava)

(1) Izvođač radova, kod provođenja mjera i aktivnosti odbrane od poplava, ima pravo korištenja šljunka, pijeska, zemlje ili drugog materijala sa zemljišta vlasnika, odnosno korisnika zemljišta na kojem se provode mjere i aktivnosti iz člana 52. ovog zakona.

(2) Izvođač radova dužan je kod korištenja zemljišta iz stava (1) ovog člana u što manjoj mjeri uticati na stanje zemljišta, a po prestanku opasnosti od poplava nastalu štetu otkloniti.

Član 104.

(1) Vlasnik, odnosno korisnik zemljišta iz člana 101. stav (1) ovog zakona dužan je dozvoliti korištenje šljunka, pijeska, zemlje ili drugog materijala sa tog zemljišta za provođenje mjera i aktivnosti iz člana 52. ovog zakona.

(2) Ako vlasnik, odnosno korisnik ne dozvoli korištenje zemljišta u skladu sa odredbom stava (1) ovog člana, općinski organ uprave nadležan za imovinsko-pravne poslove donosi rješenje o korištenju tog zemljišta.

(3) Žalba protiv rješenja iz stava (2) ovog člana ne odlaže izvršenje rješenja.

Član 105.

(Ograničenja prava vlasništva i odšteta)

(1) Vlasnik, odnosno korisnik zemljišta ima pravo na naknadu štete koja nastane zbog privremenog korištenja zemljišta iz člana 99. ovog zakona, odnosno naknadu u slučaju nemogućnosti potpunog otklanjanja štete nastale provođenjem mjera i aktivnosti iz člana 101. stav (1) i člana 103. stav (1) ovog zakona.

(2) Vlasnik, odnosno korisnik zemljišta koje je predmet ograničenja iz člana 99., 101. i 104. ovog zakona, naknadu iz stava (1) ovog člana sporazumno utvrđuje sa Ministarstvom, odnosno općinskom službom nadležnom

za vode. Ako se sporazum ne postigne o visini naknade odlučuje nadležni sud.

Član 106.

(Obaveza obeštećenja)

(1) Ako u provođenju zaštitnih mjera iz člana 40. ovog zakona nastupi šteta vlasniku, odnosno korisniku objekta i druge nekretnine, investitor, odnosno vlasnik ili korisnik sistema za snabdijevanje vodom dužan je utvrditi način obeštećenja prema općim propisima za naknadu štete kao i izvore sredstava za obeštećenje.

(2) Ako investitor, odnosno vlasnik ili korisnik sistema za snabdijevanje vodom ne postigne sporazum o naknadi iz stava (1) ovog člana, naknada se vrši u skladu sa propisima o eksproprijaciji.

(3) Vlasnik, odnosno korisnik zemljišta koje se nalazi na ugroženom području iz člana 47. ovog zakona nema pravo na naknadu štete za radnje izvršene suprotno ograničenjima ili zabranama iz članova 55. do 57. ovog zakona.

Član 107.

(Odvodnja oborinskih i drenažnih voda)

(1) Ukoliko se ne uzrokuje značajnija šteta ili smetnja fizičkom ili pravnom licu i ukoliko odvodnja vode ne može razumno biti izvršena na drugi način, vlasnik ili posjednik zemljišta za koje postoji potreba odvodnje oborinskih ili drenažnih voda može:

1. sagraditi kanal ili bilo koji drugi objekat na zemljištu koje je u vlasništvu fizičkog ili pravnog lica, uz njegovu saglasnost;
2. odvoditi oborinske ili drenažne vode u kanal ili drugi odgovarajući objekat koji je u vlasništvu fizičkog ili pravnog lica, uz njegovu saglasnost.

(2) Fizičko ili pravno lice koje poduzima aktivnosti iz stava (1) tačka 1. ovog člana, obavezno je održavati objekat u stanju koje ne uzrokuje nastanak štete na zemljištu drugog fizičkog ili pravnog lica. Fizičko ili pravno lice koje poduzima aktivnosti iz stava (1) tačka 2. ovog člana snosi troškove za potrebne izmjene u navedenim objektima, kao i njegov pripadajući dio budućih troškova održavanja objekata.

(3) U slučaju da strane iz stavova (1) i (2) ovog člana ne postignu dogovor o spornom pitanju odlučuje nadležni organ uprave, odnosno sud.

Član 108.

(Prijelaz i korištenje zemljišta za praćenje voda)

(1) Vlasnik, odnosno korisnik zemljišta dužan je dozvoliti prelazak preko zemljišta i korištenje zemljišta organu nadležnom za vode, agenciji za vodno područje, operatoru ili drugim licima angažiranim za praćenje voda.

(2) U slučaju da je praćenje iz stava (1) ovog člana onemogućeno, o spornom pitanju odlučuje općinska služba nadležna za imovinsko-pravne poslove.

(3) Vlasnik, odnosno korisnik zemljišta iz stava (1) ovog člana ima pravo na naknadu štete. Visina naknade sporazumno se utvrđuje. Ako se sporazum ne postigne o visini naknade odlučuje nadležni sud.

XI. IZGRADNJA, KORIŠTENJE, ZAŠTITA, ODRŽAVANJE I UPRAVLJANJE MJESNIM VODOVODIMA

Član 109. (Mjesni vodovodi)

Vodnim objektima iz člana 12. stav (5) ovog zakona smatraju se mjesni vodovodi.

Član 110. (Snabdijevanje vodom za piće)

(1) Izvorišta voda koja se zahvataju radi snabdijevanja vodom za piće stanovništva putem mjesnih vodovoda moraju imati dovoljne količine zdravstveno ispravne vode za piće, kako bi se u svako doba godine moglo obezbijediti neprekidno snabdijevanje vodom stanovništva.

(2) Izuzetno nadležni organ će investitoru izdati potrebne vodne saglasnosti i kad izvorišta nemaju dovoljne količine vode, ukoliko on na drugi način ne može riješiti snabdijevanje vodom.

(3) Kaptaza i rezervoari koji su, u smislu ovog zakona, sastavni dio mjesnog vodovoda, a koji služe za prihvatanje i akumuliranje vode za piće, moraju imati propisane izolacije i ostale potrebne uređaje.

(4) Kapacitet rezervoara mjesnog vodovoda treba da obezbijedi dovoljnu količinu vode za dnevnu potrošnju korisnika i rezervu za gašenje požara.

(5) Mjesni vodovod mora imati ugrađen i propisno baždaren uređaj za mjerenje količine iskorištene vode na odvodu iz rezervoara, a ako ima više odvoda iz rezervoara, na svakom odvodu.

Član 111. (Investitori za izgradnju mjesnog vodovoda)

Investitor za izgradnju mjesnog vodovoda može biti mjesna zajednica, grupa građana ili građanin.

Član 112. (Dokumenti potrebni za izgradnju mjesnog vodovoda)

(1) Izgradnja mjesnog vodovoda vrši se na osnovu izdate urbanističke saglasnosti, odnosno odobrenja za građenje po propisima o prostornom uređenju, odnosno

građenju, uz prethodno pribavljanje prethodne vodne saglasnosti i vodne saglasnosti.

(2) Pored dokumentacije iz člana 78. ovog zakona investitor je dužan da priloži i sljedeću dokumentaciju:

1. o izdašnosti izvora,
2. o sadašnjoj i budućoj potrebnoj količini vode za piće,
3. o zdravstvenoj ispravnosti vode za piće,
4. dokaz da objekat odgovara propisanim mjerama za obezbijedenje zdravstvene ispravnosti vode za piće i za zaštitu izvorišta od zagađivanja,
5. o zaštitnim zonama (član 40.) i
6. projektnu dokumentaciju najmanje na nivou idejnog projekta.

Član 113. (Izgradnja i rekonstrukcija mjesnog vodovoda)

Izgradnja ili rekonstrukcija mjesnog vodovoda vrši se na način i pod uslovima određenim u izdatoj vodnoj saglasnosti.

Član 114. (Vodna dozvola za mjesni vodovod)

(1) Po izvršenoj izgradnji ili rekonstrukciji mjesnog vodovoda, a prije izdavanja odobrenja za upotrebu po propisima o prostornom uređenju, odnosno građenju, pribavlja se vodna dozvola.

(2) Uz zahtjev za izdavanje vodne dozvole za mjesni vodovod za koji su investitori grupa građana, podnosi se i pismeni ugovor o održavanju i iskorištavanju mjesnog vodovoda i regulisanju svih drugih pitanja od značaja za mjesni vodovod, koji potpisuju svi investitori tog objekta, a koji se ovjerava na sudu, općini ili kod notara i čiji se primjerak dostavlja općinskoj službi.

(3) Općinski vodni inspektori su dužni u roku od godinu dana od početka rada agencije za vode izvršiti preglede svih mjesnih vodovoda i za sve mjesne vodovode za koje ne postoji vodoprivredna dozvola izdati rješenja o potrebi izdavanja vodoprivredne dozvole u roku od šest mjeseci.

Član 115. (Priklučenje na mjesni vodovod)

(1) Licima koja nisu učestvovala u izgradnji mjesnog vodovoda, može se odobriti priključak na mjesni vodovod na osnovu vodne saglasnosti koju izdaje općinska služba.

(2) Vodnom saglasnošću odobrit će se priključak na mjesni vodovod s obzirom na količinu vode za piće, ako može da zadovolji i potrebe interesanata i ako se njihovo snabdijevanje vodom za piće ne može izvršiti na drugi (ekonomičan i racionalan) način.

(3) Lice kome je vodnom saglasnošću odobreno priključenje na mjesni vodovod dužno je prije priključenja, odnosno korištenja vode, putem ugovora sa vlasnicima

mjesnog vodovoda, regulisati plaćanje srazmjernog dijela troškova izgradnje mjesnog vodovoda i srazmjernog dijela troškova održavanja i iskorištavanja mjesnog vodovoda.

(4) Srazmjerni dio troškova koje lice kojem je vodnom saglasnošću odobreno priključenje na mjesni vodovod treba da plati, u smislu stava (3) ovog člana, ne može biti veće od učešća svakog pojedinog investitora u izgradnji ili rekonstrukciji mjesnog vodovoda, u troškovima održavanja i iskorištavanja tog objekta.

(5) Ako lice kojem je vodnom saglasnošću odobreno priključenje na mjesni vodovod ne zaključi ugovor sa vlasnicima mjesnog vodovoda o troškovima priključenja na mjesni vodovod, odnosno korištenja vode, u smislu stava (3) ovog člana, spor rješava nadležni sud.

Član 116.

(Obezbjedenje sredstava za održavanje mjesnog vodovoda)

(1) Građani koji su mjesni vodovod izgradili vlastitim sredstvima dužni su da trajno obezbjeđuju potrebna finansijska sredstva i druge uslove za održavanje i funkcionisanje tih objekata u skladu sa njihovom prirodom i namjenom i za vršenje minimalnog broja propisanih pregleda zdravstvene ispravnosti vode za piće iz tih objekata.

(2) Svi mjesni vodovodi koji služe za snabdijevanje vodom za piće preko 500 stanovnika mogu se, uz saglasnost njihovog vlasnika, u roku od 5 godina od dana stupanja na snagu ovog zakona predati na upravljanje komunalnom preduzeću iz ove djelatnosti u općini na čijem se području nalazi taj vodovod.

(3) Cijena vode isporučene iz mjesnog vodovoda ne može biti određena ispod cijene koja osigurava pokrivanje nužnih troškova za održavanje i funkcionisanje objekata mjesnog vodovoda i troškova amortizacije.

Član 117.

(1) Ukoliko se ustanovi da vlasnici mjesnog vodovoda ne izvršavaju obavezu iz člana 116. ovog člana, općinska služba naredit će izvršavanje tih obaveza i odrediti rok za njihovo izvršenje, odnosno postupanje u skladu sa uslovima i obavezama utvrđenim u vodnoj dozvoli izdatoj za taj objekat.

(2) Ako se ustanovi da građani vlasnici mjesnog vodovoda nisu izvršili svoje obaveze ili ih nisu izvršili u roku i u skladu sa rješenjem iz stava (1) ovog člana, općinska služba izdat će vodni nalog.

Član 118.

(Zaštita izvorišta mjesnog vodovoda)

Zaštita izvorišta mjesnih vodovoda vrši se u skladu sa članom 40. ovog zakona.

Član 119.

Zabranjeno je neovlaštenim licima otvaranje i zatvaranje armatura, instalacija, hidranata i ostalih uređaja mjesnih vodovoda, izuzev u slučajevima kada je to nužno u cilju sprečavanja šteta većih razmjera.

Član 120.

(1) Ministarstvo i općinska služba su dužni da uspostave i trajno vode evidenciju o vodovodima iz člana 12. stav (1) ovog zakona, svako u okviru svoje nadležnosti.

(2) U evidenciju iz stava (1) ovog člana unose se naročito sljedeći podaci:

- Naziv vodovoda,
- Naziv kantona, općine, mjesne zajednice,
- Broj i datum izdavanja vodne saglasnosti,
- Broj i datum izdavanja urbanističke saglasnosti,
- Broj i datum izdavanja odobrenja za gradnje,
- Broj i datum izdavanja vodne dozvole,
- Broj domaćinstava koja koriste vodovod,
- Broj naknadno priključenih domaćinstava na mjesni vodovod i
- Ugovor iz člana 114. stav (2) ovog zakona.

XII. ORGANIZACIJA UPRAVLJANJA VODAMA

Član 121.

Ministarstvo izvršava poslove i zadatke utvrđene ovim zakonom, a naročito:

1. izrađuje godišnje programe utroška sredstava vodnih naknada na području Kantona, u skladu sa planovima razvoja vodoprivrede na području Federacije,
2. organizuje, odnosno vrši sve poslove i zadatke na izvršavanju programa iz tačke 1. ovog člana,
3. organizuje istražne radove, izrađuje investiciono-tehničku i drugu dokumentaciju i vrši reviziju te dokumentacije,
4. vrši sve investicione poslove i nadzor nad izgradnjom vodnih objekata iz programa razvoja vodoprivrede Kantona,
5. planira i prikuplja sredstva za finansiranje poslova i zadataka iz programa razvoja vodoprivrede Kantona,
6. izdaje vodne akte u skladu sa članom 65., a u vezi sa članom 96. stav (1) ovog zakona,
7. vodi ISV u skladu sa članom 59. ovog zakona,
8. saraduje sa općinama, privrednim društvima i drugim pravnim licima na području Kantona,

9. saraduje sa Agencijom za vodno područje rijeke Save kod izrade planova razvoja vodoprivrede Kantona i izdaje vodne akte,
10. pribavlja stručna mišljenja kod donošenja vodnih akata u nadležnosti Kantona i o drugim pitanjima u oblasti vodoprivrede na području Kantona,
11. vrši i druge poslove i zadatke u vezi sa ovim zakonom.

Član 122.

Ministarstvo je odgovorno za zakonito i racionalno korištenje sredstava koja su mu obezbijedena i stavljena na raspolaganje za obavljanje poslova i zadataka utvrđenih federalnim i ovim zakonom.

XIII. FINANSIRANJE UPRAVLJANJA VODAMA

Član 123.

(Izvori sredstava)

Sredstva za obavljanje poslova i zadataka određenih ovim zakonom osiguravaju se iz:

1. dijela opće vodne naknade i posebnih vodnih naknada koje po članu 177. stav 1. tačka 2. Federalnog zakona pripadaju Kantonu;
2. prihoda po osnovu zakupa javnog vodnog dobra na površinskim vodama II kategorije;
3. Budžeta Kantona i općine;
4. sredstava koja udružuju općine, privredna društva, druga pravna lica i građani za finansiranje namjena iz člana 125. ovog zakona;
5. kreditnih sredstava;
6. sredstava osiguranih posebnim zakonom;
7. donacija i ostalih sredstava u skladu sa zakonom.

Član 124.

(Vodne naknade)

Opća vodna naknada i posebne vodne naknade, obveznici, način i uslovi plaćanja, prikupljanje i raspodjela vodnih naknada regulisani su članovima 169. do 177. Federalnog zakona.

Član 125.

(Korištenje prihoda)

Prihodi iz člana 123. ovog zakona koriste se za:

1. finansiranje poslova i zadataka iz člana 121. stav (1) ovog zakona,
2. sufinansiranje izgradnje i održavanje vodnih objekata iz člana 9. ovog zakona,
3. ostale aktivnosti vezane za poslove upravljanja vodama (izrada tehničke dokumentacije, podloga za izdavanje koncesija i dr.) u skladu sa godišnjim planom i programom Ministarstva.

XIV. NADZOR NAD PROVOĐENJEM OVOG ZAKONA

1. Upravni nadzor

Član 126.

(1) Ministarstvo vrši upravni nadzor nad provođenjem ovog zakona i propisa donesenih na osnovu ovog zakona i propisa za čije donošenje po ovom zakonu ovlašteni kantonalni organi.

(2) Općinska služba vrši upravni nadzor nad provođenjem ovog zakona i propisa donesenih na osnovu ovog zakona koji su ovim zakonom stavljeni u nadležnost općine, ako ovim zakonom nije drugačije određeno.

Član 127.

(1) Federalno ministarstvo vrši nadzor nad zakonitošću vodnih akata koje donose Ministarstvo i Općinska služba, rješavajući u upravnim stvarima o pravima i obavezama fizičkih i pravnih lica koji su federalnim zakonom propisana kao nadležnost kantonalnog i općinskog organa uprave nadležnog za vode.

(2) Protiv rješenja Ministarstva, odnosno općinske službe o izdatom vodnom aktu iz člana 107. Federalnog zakona, a u vezi sa članom 139. stav 2. Federalnog zakona donesenom u prvostepenom postupku, žalba se izjavljuje Federalnom ministarstvu.

2. Organizacija vršenja inspeksijskog nadzora

Član 128.

(Zajednička odredba)

Inspeksijski nadzor nad provođenjem ovog zakona i propisa donesenih na osnovu ovog zakona provodi se u skladu sa odredbama ovog zakona, Zakona o organizaciji organa uprave u Federaciji Bosne i Hercegovine ("Službene novine Federacije BiH", broj: 35/05) i Zakona o inspekcijama u Federaciji BiH ("Službene novine FBiH", broj: 69/05), koje se odnose na inspeksijski nadzor.

(Kantonalna i općinska vodna inspekcija)

Član 129.

(1) Inspeksijski nadzor nad provedbom ovog zakona i propisa donesenih na osnovu ovog zakona koji su ovim zakonom stavljeni u nadležnost Kantona, provodi Kantonalna uprava za inspeksijske poslove u skladu sa članom 216. stav 1. Federalnog zakona i člana 131. stav (1) ovog zakona.

(2) Inspeksijski nadzor nad provođenjem ovog zakona i propisa donesenih na osnovu ovog zakona koji su

stavljani u nadležnost općina provodi općinska vodna inspekcija, u skladu sa članom 131. stav (2) ovog zakona.

Član 130.

(Predmet inspekcijskog nadzora)

Inspekcijski nadzor obuhvata:

1. preduzimanje inspekcijskih radnji na utvrđivanju stanja izvršavanja propisa kod pravnih i fizičkih lica koja su u obavljanju svoje djelatnosti i radu dužna postupati prema odredbama ovog zakona i propisa donesenih na osnovu ovog zakona,
2. određivanje upravnih mjera radi sprečavanja i otklanjanja nezakonitosti u provođenju propisa iz tačke 1. ovog člana,
3. preduzimanje drugih mjera određenih ovim zakonom, Zakonom o inspekcijama i drugim propisima.

Član 131.

(Ovlaštenja inspektora)

(1) Osim ovlaštenja i dužnosti iz člana 128. ovog Zakona, kantonalni vodni inspektor po ovom zakonu ovlašten je i dužan da:

1. spriječi neovlašteno korištenje vode, u skladu sa odredbom člana 96. stav (1) ovog zakona,
2. spriječi ili ograniči ostvarivanje prava na korištenje vode, ako se ona ne koristi u skladu sa vodnom dozvolom, u skladu sa odredbom člana 96. stav (1) ovog zakona,
3. zaustavi izgradnju ili izvođenje zahvata u prostoru, ako se ta izgradnja i zahvati izvode bez vodne saglasnosti ili u suprotnosti s njom,
4. odredi privremeni prekid obavljanja djelatnosti, ako se krše odredbe dozvole iz tačke 2. stav (1) ovog člana,
5. zabrani upotrebu objekata i uređaja, ako se koriste bez vodne dozvole ili u suprotnosti sa vodnom dozvolom u skladu sa odredbom člana 96. stav (1) ovog zakona,
6. zabrani ili ograniči ispuštanje otpadnih voda u površinske vode ili indirektno ispuštanje otpadnih voda u podzemne vode, ako se to ispuštanje vrši u suprotnosti sa odredbama člana 27. ovog zakona i odredi obavezu vraćanja u prvobitno stanje,
7. zabrani vađenje materijala iz površinskih voda iz člana 96. stav (1) tačka 2. ovog zakona, ako se vađenje toga materijala vrši bez vodnog akta ili u suprotnosti s vodnim aktima,
8. odredi obavezu vraćanja u prvobitno stanje i obavezu utvrđivanja štete i naknade štete nastale radnjama iz tačke 7. stav (1) ovog člana od strane nadležne agencije za vode,

9. odredi i druge mjere u skladu sa ovim zakonom ili na osnovu propisa i vodnih akata donesenih na osnovu ovog zakona.

(2) Općinski vodni inspektor osim ovlaštenja i dužnosti iz člana 128. ovog zakona, prema ovom zakonu ovlašten je i dužan da:

1. spriječi neovlašteno korištenje vode, u skladu sa odredbom člana 96. stav (2) ovog zakona,
2. spriječi ili ograniči ostvarivanje prava na korištenje vode, ako se ona ne koristi u skladu sa vodnom dozvolom, u skladu sa odredbom člana 96. stav (2) ovog zakona,
3. zaustavi izgradnju ili izvođenje zahvata u prostoru, ako se ta izgradnja i zahvati izvode bez vodne saglasnosti ili u suprotnosti s njom,
4. odredi privremeni prekid obavljanja djelatnosti, ako se krše odredbe dozvole iz tačke 2. stav (1) ovog člana,
5. zabrani upotrebu objekata i uređaja, ako se koriste bez vodne saglasnosti ili u suprotnosti s njom u skladu sa odredbom člana 96. stav (2) ovog zakona,
6. izvrši kontrolu vađenja materijala iz površinskih voda iz člana 96. stav (1) tačka 2. ovog zakona i da o utvrđenim nepravilnostima bez odlaganja obavijesti kantonalnog vodnog inspektora,
7. odredi i druge mjere u skladu sa ovim zakonom ili na osnovu propisa i vodnih akata donesenih na osnovu ovog zakona.

Član 132.

(Upravne radnje)

(1) Kantonalni i općinski vodni inspektor u izvršavanju poslova inspekcijskog nadzora preduzimaju upravne radnje u skladu sa Zakonom o inspekcijama i ovim zakonom, te o utvrđenim činjenicama sačinjavaju zapisnik.

(2) Kantonalni vodni inspektor donosi pisano rješenje i naređuje njegovo izvršenje, ako:

1. prijeteći nastanak neposredne opasnosti od poplava, izlivanja voda ili pogoršanja stanja u toku poplave,
2. prijeteći nastanak nestašice vode ili teškoće u opskrbi vodom,
3. postoji opasnost za zagađenje vode ili je nastupilo zagađenje u obimu u kojem to predstavlja direktnu opasnost za život i zdravlje ljudi ili za životinjski ili biljni svijet,
4. postoji opasnost za zagađenje izvora vode namijenjenog snabdijevanju vodom za piće,
5. postoji direktna opasnost od zagađenja površinskih i podzemnih voda,
6. nastupi suša, ili bi iz drugih razloga moglo doći do nestašice vode ili poteškoća u snabdijevanju vodom za piće,

7. postoji direktna opasnost od pojave odrona zemlje, klizišta ili drugih vidova erozije,
8. je to potrebno za osiguranje provođenja opće upotrebe vode iz člana 21. ovog zakona ili za osiguranje stvarne služnosti iz člana 98. do 108. ovog zakona, ukoliko se vlasnik ili drugi korisnik vodnog dobra iz člana 4. stav (3) i (4) ovog zakona ili drugog priobalnog zemljišta suprotstavlja prelasku preko svoje zemlje ili obavljanju radova radi provođenja ovog zakona,
9. je to potrebno za osiguranje izvođenja radova na istraživanju voda, u skladu sa odredbama ovog zakona,
10. to zahtijevaju i druge hitne situacije određene zakonom.

(3) Izuzetno, kantonalni vodni inspektor za slučajeve iz tačaka 1., 3., 4., 7. i 10. stava (2) ovog člana može donijeti usmeno rješenje i narediti njegovo izvršenje bez odlaganja, s tim što je dužan donijeti pisano rješenje najkasnije u roku od osam dana od dana donošenja usmenoga rješenja. Sadržaj pisanog rješenja mora odgovarati sadržaju usmenog rješenja.

(4) Ako pravno ili fizičko lice koje je odgovorno za opasnosti i posljedice iz tačaka 1., 3., 4., 7. i 10. stava (2) ovog člana ne postupi po nalogu vodnog inspektora ili ako se ne može identificirati osoba odgovorna za nastanak opasnosti i posljedica, kantonalna vodna inspekcija će angažovati ovlaštenu instituciju iz člana 133. ovog zakona, radi eliminisanja opasnosti ili ublažavanja posljedica.

(5) Troškove nastale provedbom mjera iz stava (4) ovog člana snosi nadležna agencija za vode, a te troškove naknadno naplaćuje od odgovornog lica zbog čijeg djelovanja ili propuštanja djelovanja došlo do nastanka opasnosti, odnosno neželjenih posljedica.

Član 133.

(Stručni poslovi po nalogu inspekcije)

(1) Obavljanje određenih stručnih poslova za potrebe inspeksijskog nadzora (radovi na sprečavanju širenja zagađenja u slučaju akcidenta i čišćenje zagađenja iz vode i vodnog dobra, ispitivanje, ekspertiza i sl.) koji zahtijevaju posebnu tehničku opremu i specijalizirane stručnjake ili primjenu naučnih metoda i postupaka, može se povjeriti ovlaštenim i osposobljenim institucijama (ustanovama, preduzećima, laboratorijima, društvima) koje obavljaju takve poslove.

(2) Institucije iz stava (1) ovog člana angažiraju se na osnovu naloga kantonalnog vodnog inspektora, putem mjesno nadležne agencije za vode.

Član 134.

(Inspeksijski postupci)

(1) Kada utvrdi da je povrijeđen ovaj zakon, propis ili drugi akt donesen na osnovu ovog zakona, kantonalni i općinski vodni inspektor zapisnikom konstatuje nepravilnost ili nedostatak i rješenjem određuju mjere i rok za njihovo otklanjanje.

(2) Pored ovlaštenja i dužnosti određenih zakonom, u slučaju iz stava (1) ovog člana, inspektori iz stava (1) ovog člana ovlašteni su i dužni da:

1. narede obustavljanje izvođenja radova, ako se vrše protivno vodnom aktu ili se vrše bez vodnog akta, a propisana je obaveza njegova pribavljanja,
2. narede, u saradnji sa građevinsko – urbanističkom inspekcijom, uklanjanje sagrađenog objekta ili postrojenja izgrađenog bez vodnog akta, ako u roku od 60 dana nije pribavljen vodni akt,
3. narede privremenu obustavu rada, odnosno obavljanje djelatnosti pravnog lica ili njegovog dijela, ako utvrdi da otpadne vode sadrže opasne materije u količini većoj od dozvoljene ili se zahvataju količine vode veće od dozvoljenih,
4. zabrani preduzimanje radnji koje nisu dozvoljene ovim zakonom.

Član 135.

(Pokretanje postupaka)

(1) Kantonalni i općinski vodni inspektor dužni su, kada utvrde da je učinjeno djelo koje ima obilježje prekršaja propisanog ovim zakonom, podnijeti zahtjev nadležnom organu za pokretanje prekršajnog postupka.

(2) Kantonalni i općinski vodni inspektori dužni su kada utvrde da je učinjeno djelo koje ima obilježja krivičnog djela, čija su obilježja propisana krivičnim zakonom, podnijeti pisanu prijavu nadležnom tužilaštvu.

Član 136.

(Žalbe na rješenje inspektora)

(1) Protiv rješenja kantonalnog, odnosno općinskog vodnog inspektora, koje je doneseno na osnovu Federalnog zakona i propisa donesenih na osnovu tog zakona, žalba se izjavljuje Federalnoj vodnoj inspekciji, putem kantonalne, odnosno općinske vodne inspekcije.

(2) Protiv rješenja kantonalnog vodnog inspektora donesenog na osnovu ovog zakona žalba se izjavljuje Ministarstvu.

(3) Protiv rješenja općinskog vodnog inspektora donesenog na osnovu ovog zakona žalba se izjavljuje Kantonalnoj upravi za inspeksijske poslove putem općinske vodne inspekcije.

(4) Žalba odlaže izvršenje rješenja izuzev u slučajevima navedenim u članu 132. stav (2) i (3) ovog zakona.

**Član 137.
(Akcidenti)**

(1) U slučaju akcidenta ili drugog vanrednog događaja, odmah po saznanju za njegovo nastupanje kantonalni, odnosno općinski vodni inspektor je dužan, na području za koje je nadležan, preduzeti radnje i mjere predviđene ovim zakonom i propisima donesenim na osnovu ovog zakona, bez obzira na stvarnu nadležnost i o tome obavijestiti kantonalnu inspekciju nadležnu za zaštitu okoline.

(2) U provođenju aktivnosti iz stava (1) ovog člana vodni inspektori su dužni saradivati i razmjenjivati informacije o mjerama i aktivnostima koje su preduzete ili koje je neophodno preduzeti.

**Član 138.
(Saradnja vodnih inspektora)**

(1) Vodni inspektori dužni su međusobno saradivati i informisati se o pojavama, problemima i načinu rješavanja pojedinih slučajeva. Inicijativu za saradnju može pokrenuti svaki od vodnih inspektora.

(2) Saradnja iz stava (1) ovog člana ostvaruje se i sa federalnim vodnim inspektorima.

(3) Vodna inspekcija u svom radu saraduje i s drugim inspekcijama i tijelima u vršenju svojih ovlaštenja.

**Član 139.
(Odnosi federalne i kantonalne
vodne inspekcije)**

(1) Ako federalni vodni inspektor utvrdi da kantonalni vodni inspektor ne provodi odredbe ovog zakona koje se odnose na nadzor iz njegove nadležnosti, pisanim putem će zatražiti od Kantonalne uprave za inspeksijske poslove preduzimanje bez odlaganja zakonom utvrđenih mjera i aktivnosti.

(2) Ako kantonalni vodni inspektor utvrdi da općinski vodni inspektor ne provodi odredbe ovog zakona koje se odnose na nadzor iz njegove nadležnosti, pisanim putem će zatražiti od općinskog organa uprave nadležnog za vodnu inspekciju da bez odlaganja preduzme zakonom utvrđene mjere i aktivnosti.

(3) Ako i pored preduzete aktivnosti iz stava (1) i (2) ovog člana od federalnog i kantonalnog vodnog inspektora kantonalni i općinski vodni inspektor ne preduzmu zakonom utvrđene mjere, federalni vodni inspektor provest će mjere na teret budžeta Kantona, odnosno općine i o tome obavijestiti ministra, odnosno načelnika općine.

XV. KAZNE NE ODREDBE**Član 140.
(Prekršaji)**

(1) Novčanom kaznom u iznosu od 1.000,00 KM do 15.000,00 KM bit će kažnjeno za prekršaj pravno lice ako:

1. postupa suprotno odredbama iz člana 7. ovog zakona,
2. vodni objekat iz člana 9. ovog zakona ne održava u funkcionalnom stanju i ne koristi ga u skladu sa njegovom prirodom i namjenom iz člana 14. stav (1),
3. po prestanku upotrebe vodnog objekta iz člana 9. ovog zakona ne postupa u skladu sa odredbama iz člana 14. stav (2),
4. ne čuva vodni objekat iz člana 9. ovog zakona i uređaje na njemu u skladu sa odredbama iz člana 14. stav (5),
5. ne osigura stalni i sistematski pregled vode i ne preduzme mjere za osiguranje zdravstvene ispravnosti vode za piće i tehničke ispravnosti uređaja iz člana 23. stav (2) ovog zakona,
6. vrši radnje suprotno odredbama iz člana 28. ovog zakona,
7. otpadnu vodu ispušta suprotno odredbi iz člana 28. stav (1) ovog zakona,
8. proizvodi, rukuje, čuva ili odlaže opasne materije i otpad na vodama i vodnom dobru iz člana 32. stav (1) ovog zakona,
9. ne preduzme mjere da spriječi ili ublaži uticaje prouzrokovane incidentom i o tome blagovremeno ne obavijesti policijsku upravu, vodnu inspekciju ili agenciju za vode iz člana 33. stav (1) ovog zakona,
10. ne provodi odluku o zaštiti izvorišta iz člana 38. stav (3) ovog zakona,
11. ne preduzme mjere za zaštitu kupališta iz člana 41. ovog zakona,
12. vrši radove i radnje zabranjene članom 6. stav (1) i članom 57. ovog zakona,
13. koristi vodu, ispušta otpadne vode u površinske vode i vodno dobro ili vrši druge aktivnosti i zahvate suprotno odredbama iz vodnog akta iz člana 66. ovog zakona,
14. koristi vodu, ispušta otpadne vode u površinske vode i vodno dobro ili vrši druge aktivnosti i zahvate bez pribavljenog vodnog akta, za koje je ovim zakonom propisana obaveza pribavljanja vodnog akta iz člana 67. ovog zakona,
15. po isteku roka važenja vodne saglasnosti za vađenje materijala ne dovede korito i obale vodotoka u stanje predviđeno vodnim aktom iz člana 72. stav (5) ovog zakona,
16. ne postupa po rješenju vodnog inspektora iz člana 134. stav (1) ovog zakona,
17. se priključi na općinski vodovod i/ili kanalizaciju bez saglasnosti komunalnog preduzeća koje upravlja tim objektima ili na mjesni vodovod

i/ili kanalizaciju bez vodne saglasnosti nadležnog općinskog organa iz člana 115. ovog Zakona.

(2) Za prekršaj iz stava (1) ovog člana bit će kažnjena i odgovorna osoba u pravnom licu novčanom kaznom u iznosu od 100,00 KM do 3.000,00 KM.

Član 141.

(1) Novčanom kaznom u iznosu od 500,00 KM do 10.000,00 KM bit će kažnjeno za prekršaj pravno lice ako:

1. ne vodi evidenciju o količinama zahvaćene vode i o tome ne dostavlja podatke nadležnoj agenciji za vode iz člana 25. stav (1) ovog zakona,
2. prilikom rudarskih radova, iskopa tunela i drugih iskopa i bušenja tla naiđe na podzemnu vodu i o tome ne obavijesti nadležni organ iz člana 26. stav (1) ovog zakona),
3. ne dozvoli ovlaštenoj osobi uzimanje podataka i obavljanje potrebnih ispitivanja nađenog ležišta vode (član 26. stav (2) ovog zakona),
4. upotrebljava đubrivo ili sredstva za zaštitu bilja na vodnom dobru (član 30. stav (2) ovog zakona),
5. pere vozilo ili druge strojeve i uređaje u površinskoj vodi (član 31. ovog zakona),
6. primijeti incident iz člana 33. stav (1) ovog zakona, a o tome ne obavijesti nadležni organ iz člana 33. stav (2) ovog zakona,
7. postavlja stalne ili privremene objekte ili druge prepreke ili ako sprječava slobodan prijelaz preko vodnog dobra i prilaz obalama na području kupališta iz člana 41. stav (3) ovog zakona,
8. vrši radove i radnje zabranjene članom 56. stav (2) ovog zakona,
9. ne ustupi mjesno nadležnoj agenciji za vodno područje podatke koje posjeduje, a koji su od značaja za upravljanje vodama (član 63. ovog zakona).

(2) Za prekršaj iz stava 1. ovog člana bit će kažnjeno i odgovorno lice u pravnom licu novčanom kaznom u iznosu od 100,00 KM do 3.000,00 KM.

Član 142.

Novčanom kaznom u iznosu od 100,00 KM do 1.500,00 KM bit će kažnjeno za prekršaj fizičko lice ako:

1. postupa suprotno odredbama iz člana 7. ovog zakona,
2. vodni objekat iz člana 11. stav (3), člana 12. stav (3) i člana 13. ovog zakona ne održava u funkcionalnom stanju i ne koristi ga u skladu sa njegovom prirodom i namjenom (član 14. stav (1)),
3. po prestanku korištenja vodnog objekta iz člana 11. stav (3), člana 12. stav (3) i člana 13. ovog

zakona ne postupi u skladu sa odredbama iz člana 14. stav (2),

4. ne čuva vodni objekat iz člana 11. stav (3), člana 12. stav (3) i člana 13. ovog zakona i uređaje na njemu u skladu sa odredbama iz člana 14. stav (5),
5. ne dozvoli ovlaštenoj osobi uzimanje podataka i obavljanje potrebnih ispitivanja nađenog ležišta vode iz člana 26. stav (2) ovog zakona,
6. vrši radnje suprotno odredbama iz člana 27. ovog zakona,
7. otpadnu vodu ispušta suprotno odredbi iz člana 28. stav (1) ovog zakona,
8. upotrebljava đubrivo ili sredstva za zaštitu bilja na vodnom dobru (član 30. stav (2)),
9. pere vozilo ili druge mašine i uređaje u površinskoj vodi (član 31. ovog zakona),
10. proizvodi, rukuje, čuva ili odlaže opasne materije i otpad na vodama i vodnom dobru (član 32. stav (1) ovog zakona),
11. ne preduzme potrebne mjere da spriječi ili ublaži uticaje prouzrokovane incidentom i o tome pravovremeno ne obavijesti policijsku upravu, vodnu inspekciju ili agenciju za vode (član 33. stav (1) ovog zakona),
12. o incidentu iz člana 33. stav (1) ovog zakona ne obavijesti nadležni organ (član 33. stav (2)),
13. ne poštuje zabrane iz odluke o zaštiti izvorišta iz člana 38. stav (3) ovog zakona,
14. postavlja stalne ili privremene objekte ili druge prepreke ili ako sprječava slobodan prijelaz preko vodnog dobra i prilaz obalama na području kupališta (član 41. stav (3) ovog zakona),
15. vrši radove i radnje zabranjene članovima 56. i 57. ovog zakona,
16. ne ustupi mjesno nadležnoj agenciji za vodno područje podatke koje posjeduje, a koji su od značaja za upravljanje vodama (član 63. ovog zakona),
17. koristi vodu, ispušta otpadne vode u površinske vode i vodno dobro ili vrši druge aktivnosti i zahvate suprotno odredbama iz vodnog akta (član 66. ovog zakona),
18. koristi vodu, ispušta otpadne vode u površinske vode i vodno dobro ili vrši druge aktivnosti i zahvate bez pribavljenja vodnog akta, za koje je ovim zakonom propisana obaveza pribavljanja vodnog akta (član 67. ovog zakona),
19. po isteku roka važenja vodne saglasnosti za vađenje materijala ne dovede korito i obale vodotoka u stanje predviđeno vodnim aktom (član 72. stav (5) ovog zakona),
20. ne postupi po rješenju vodnog inspektora iz člana 134. stav (1) ovog zakona.

21. sa svim ostalim vlasnicima mjesnog vodovoda ne zaključi pismeni ugovor iz člana 114. stav (2) ovog zakona,
22. licu kojem je vodnom dozvolom odobren priključak na mjesni vodovod i korištenje vode sa tog vodovoda ometa priključenje na mjesni vodovod ili mu ometa snabdijevanje vodom iz mjesnog vodovoda (član 115. ovog zakona),
23. ne obezbjeđuje finansijska sredstva i druge uslove za održavanje i funkcioniranje mjesnog vodovoda u skladu sa njegovom prirodom i namjenom ili uspostavljanje i održavanje zona sanitarne zaštite za mjesni vodovod i za vršenje minimalnog broja propisanih pregleda zdravstvene ispravnosti vode za piće (član 116. ovog zakona),
24. neovlašteno pristupi u područje zaštitne zone mjesnog vodovoda iz člana 38. stav (3) ovog zakona,
25. vrši zabranjenu radnju iz člana 119. ovog zakona,
26. ne podnese zahtjev za izdavanje nove vodne dozvole u propisanom roku iz člana 144. ovog zakona,
27. ne podnese zahtjev za izdavanje vodne dozvole u propisanom roku iz člana 148. ovog zakona,
28. se priključi na općinski vodovod i/ili kanalizaciju bez saglasnosti komunalnog preduzeća koje upravlja tim objektima ili na mjesni vodovod i/ili kanalizaciju bez vodne saglasnosti nadležnog općinskog organa (član 115. ovog zakona).

XVI. PRELAZNE I ZAVRŠNE ODREDBE

Član 143. (Planski dokumenti)

Do donošenja strategije upravljanja vodama iz člana 24. Federalnog zakona kao planski dokumenti za upravljanje vodama u Kantonu koristit će se odgovarajući planovi i programi razvitka vodoprivrede i pojedinih oblasti vodoprivrede (zaštita od štetnog djelovanja voda, zaštita voda i korištenje voda), doneseni do dana stupanja na snagu ovog zakona.

Član 144. (Ranije izdati vodoprivredni akti)

(1) Vodoprivredne dozvole koje su izdate do dana početka rada agencija za vode usaglasit će se s odredbama ovog zakona, u roku do pet godina od dana stupanja na snagu ovog zakona.

(2) Vodoprivredni uslovi koji su izdati do dana početka rada agencija za vode usaglasit će se sa odredbama ovog zakona pri izdavanju vodne saglasnosti.

(3) Vodoprivredne saglasnosti koje su izdate do dana početka rada agencija za vode usaglasit će se s odredbama ovog zakona pri izdavanju vodnih dozvola.

(4) Nosioци prava iz vodoprivrednog akta iz stava (1) ovog člana dužni su podnijeti zahtjev za preispitivanje vodne dozvole, u roku do dvije godine od dana stupanja na snagu ovog zakona.

(5) U slučaju da zahtjev iz stava (4) ovog člana nije podnesen u roku iz stava (4) ovog člana, vodoprivredni akt iz stava (1) ovog člana prestaje da važi.

(6) Odredbe iz stava (1) ovog člana ne odnose se na vodoprivredne dozvole koje važe pet godina ili manje, od dana stupanja na snagu ovog zakona.

(7) Do donošenja podzakonskog akta iz člana 38. stav (2) ovog zakona, primjenjivaće se odluke o zaštiti izvorišta koje su donijeli nadležni organi općina i Kantona prije stupanja na snagu Federalnog zakona i ovog zakona, a iste će se usaglasiti sa ovim zakonom u roku od 6 mjeseci od donošenja podzakonskog akta iz člana 38. stav (2) ovog zakona.

Član 145. (Neriješeni zahtjevi za izdavanje vodoprivrednih akata)

Zahtjevi za izdavanje vodoprivrednih akata koji su podneseni nadležnom organu do dana početka rada agencija za vode, rješavat će se u skladu sa Zakonom o vodama ("Službene novine Federacije BiH", broj: 18/98), Zakonom o vodama Zeničko-dobojskog kantona ("Službene novine Zeničko-dobojskog kantona", broj: 8/00 i 15/03) i propisima donesenim na osnovu navedenih zakona.

Član 146. (Inspekcijски nadzor)

Do dana početka rada agencija za vode inspekcijски nadzor vršit će se u skladu sa Zakonom o vodama ("Službene novine Federacije BiH", broj: 18/98), Zakonom o vodama Zeničko-dobojskog kantona ("Službene novine Zeničko-dobojskog kantona", broj: 8/00 i 15/03) i propisima donesenim na osnovu navedenih zakona.

Član 147. (Postupci po žalbama)

Postupci po žalbama koji nisu riješeni do dana početka rada agencija za vode riješit će se u skladu sa Zakonom o vodama ("Službene novine Federacije BiH", broj: 18/98), Zakonom o vodama Zeničko-dobojskog kantona ("Službene novine Zeničko-dobojskog kantona", broj: 8/00 i 15/03) i propisima donesenim na osnovu navedenih zakona.

Član 148.**(Postojeći objekti i aktivnosti za koje nije izdat vodoprivredni akt)**

(1) Vlasnici, odnosno korisnici postojećih objekata i postrojenja koja iskorištavaju vode ili ispuštaju otpadne vode i druge opasne i štetne materije u vode, za koje nije pribavljena vodoprivredna dozvola do dana stupanja na snagu ovog zakona, dužni su da podnesu zahtjev za izdavanje vodne dozvole u roku od šest mjeseci od dana početka rada agencija.

(2) U slučaju da zahtjev iz stava (1) ovog člana nije podnesen u predviđenom roku, rješenjem nadležnog organa vodne inspekcije zabraniće se upotreba objekata, odnosno postrojenja iz stava (1) ovog člana.

Član 149.**(Primjena postojećih podzakonskih propisa)**

Do donošenja propisa iz člana 219. stav 1. i 2. i člana 220. stav 1. i 2. Federalnog zakona primjenjivaće se podzakonski propisi doneseni na osnovu Zakona o vodama ("Službene novine Federacije BiH", broj: 18/98), Zakona o vodama Zeničko-dobojskog kantona ("Službene novine Zeničko-dobojskog kantona", broj: 8/00 i 15/03) kao i podzakonski propisi koji su se primjenjivali do dana stupanja na snagu ovog zakona, a koji nisu u suprotnosti sa ovim zakonom.

Član 150.**(Prestanak primjene Zakona)**

Danom početka primjene ovog zakona prestaje važiti Zakon o vodama Zeničko-dobojskog kantona ("Službene novine Zeničko-dobojskog kantona", broj: 8/00 i 15/03).

Član 151.**(Stupanje na snagu i početak primjene)**

Ovaj zakon stupa na snagu osmog dana od dana objavljivanja u "Službenim novinama Zeničko-dobojskog kantona", a njegova primjena počinje danom početka rada agencija za vode, u skladu sa članom 207. stav 3. Federalnog zakona.

Broj: 01-02-22242/07
Datum, 28.09.2007. godine
Zenica

PREDSJEDAVALA
Sejad Zaimović, s.r.

255.

Na osnovu člana 37. stav 1. tačka g) Ustava Zeničko-dobojskog kantona, Skupština Zeničko-dobojskog kantona, na 10. sjednici održanoj 27.09.2007. godine, donosi

O D L U K U**o davanju saglasnosti na Izmjene i dopune Finansijskog plana Zavoda zdravstvenog osiguranja Zeničko-dobojskog kantona za 2007. godinu****I**

Daje se saglasnost na Izmjene i dopune Finansijskog plana Zavoda zdravstvenog osiguranja Zeničko-dobojskog kantona za 2007. godinu.

II

Odluka stupa na snagu danom donošenja i objavit će se u "Službenim novinama Zeničko-dobojskog kantona".

Broj: 01-14-22243/07
Datum, 28.09.2007. godine
Zenica

PREDSJEDAVALA
Sejad Zaimović, s.r.

Na osnovu člana 18. stav 1. i člana 23. stav 4. Zakona o budžetima u Federaciji Bosne i Hercegovine ("Službene novine Federacije Bosne i Hercegovine", broj: 19/06) i člana 103. Zakona o zdravstvenom osiguranju ("Službene novine Federacije Bosne i Hercegovine", broj: 30/97 i 7/02), Upravni odbor Zavoda zdravstvenog osiguranja Zeničko-dobojskog kantona, na tridesetoj sjednici, održanoj 30.07.2007. godine, donosi:

**IZMJENE I DOPUNE
FINANSIJSKOG PLANA
Zavoda zdravstvenog osiguranja
Zeničko-dobojskog kantona
za 2007. godinu**

Član 1.

U Finansijskom planu Zavoda zdravstvenog osiguranja Zeničko-dobojskog kantona za 2007. godinu ("Službene novine Zeničko-dobojskog kantona", broj: 1/07), u članu 1. iza riječi «prihodi» broj «88.254.000» zamjenjuje se brojem «98.754.410», a iza riječi «izdaci» broj «88.254.000» zamjenjuje se brojem «98.754.410».

Član 2.

Član 2. mijenja se i glasi:

"Prihodi i izdaci utvrđuju se u Bilansu prihoda i izdataka za 2007. godinu, kako slijedi:"